

文

社121  
673  
部大:79



文獻通考卷第三百六

鄱 陽 馬 端 臨 貴 與 著



物異考十二

恒風

春秋僖公十六年正月六鷓退蜚過宋都師古曰鷓音五狄反左

氏傳曰風也劉歆以為風發於他所至宋而高鷓高蜚

而逢之則退經以見者為文故記退蜚傳以實應著言

風常風之罰也象宋襄公區霧自用不容臣下逆司馬

子魚之諫而與彊楚爭盟師古曰子魚公子目夷也桓公之子而為司馬爭盟謂為

鹿上之盟以求諸侯於楚子魚諫曰小國爭盟禍也公不聽之後六年為楚所執師古曰僖

二十一年楚執宋公以伐 應六鵙之數云京房易傳曰

宋距六鵙退飛凡六年 潛龍勿用師古曰乾初九爻辭衆逆同志至德迺潛厥異風其風

也行不解物不長師古曰不解物謂物逢之而雨小而

傷政悖德隱茲謂亂厥風先風不雨大風暴起發屋折

木守義不進茲謂耄厥風雲俱起折五穀莖臣易上政

茲謂不順厥風大焱發屋師古曰焱疾風也音必遙反賦斂不理茲

謂禍厥風絕經緯如淳曰有所破壞絕匹帛之屬也晉灼曰南北為經東西為緯絲因風暴

亂不端理也止卽温温卽蟲侯專封茲謂不統厥風疾而樹

不搖穀不成辟不思道利茲謂無澤師古曰道讀導不

利厥風不搖木旱無雲傷禾公常於利茲謂亂師古曰公上爵

也常於利謂心常求利也厥風微而温生蟲蝗害五穀棄正作淫茲

謂惑厥風温螟蟲起害有益人之物侯不朝茲謂叛厥

風無恒地變赤而殺人

漢文帝二年六月淮南王都壽春大風毀民室殺人時

淮南王破南越後遂謀逆帝赦之遷蜀道死 五年吳

暴風雨壞城官府民室時吳王濞謀為逆亂後卒誅滅

五年十月楚王都彭城大風從東南來毀市門殺人

時王戊初嗣位後坐淫削國與吳王謀反誅 武帝元

光五年秋七月大風拔木 征和二年夏四月大風發

屋折木 昭帝元鳳元年燕王都薊大風雨拔宮中樹

乾隆十二年校刊 物異十二

七圍以上十六株壞城樓後燕王旦謀反發覺誅成  
帝建始元年十二月大風拔甘泉時中大木十圍以上  
王莽天鳳元年七月大風拔木飛北闕直城屋瓦  
地皇元年七月大風毀王路堂

後漢光武於更始元年六月中破王尋王邑兵于昆陽  
大雷風屋瓦皆飛 和帝永元五年五月戊寅南陽大  
風拔樹木 安帝永初元年大風拔樹是時鄧太后攝  
政以清河王子年少號精耳故立之是爲安帝不立皇  
太子勝以爲安帝賢必當德鄧氏也後安帝親讒廢免  
鄧氏令郡縣迫切死者八九人家至破壞此爲瞽瞍也

是後西羌亦大亂涼州十有餘年 二年六月京師及

郡國四十大風拔木 三年五月癸酉京都大風拔南

郊道梓樹九十六株 七年八月丙寅京都大風拔樹

元初二年二月癸亥京都大風拔樹 六年夏四月

沛國勃海大風拔樹三萬餘株 延光二年三月丙申

河南潁川大風拔樹六月壬午郡國十一大風拔樹是

時安帝親讒曲直不分 三年京都及郡國三十六大

風拔樹 靈帝建寧二年四月癸巳京都大風雨雹拔

郊道樹十一圍已上百餘株其後晨迎氣東郊道於雒

水西橋逢暴風雨鹵簿車或發蓋百官霑濡還不至郊

使有司行禮迎氣西郊亦壹如此 中平五年六月丙寅大風拔樹 獻帝初平四年六月右扶風大風發屋拔木

魏齊王正始九年十一月大風數十日發屋折樹十二月戊午晦尤甚動太極東閣 嘉平元年正月壬辰朔西北大風發屋折樹木昏塵蔽天按管輅說此爲時刑大風執政之憂也是時曹爽區霭自專驕僭過度此思心不睿恒風之罰也後踰旬而爽誅滅

吳孫權太元元年八月朔大風江海涌溢平地水深八尺拔南陵樹二千株石碑蹉動吳城兩門飛落按華覈

對役繁賦重區霭不容之罰也明年權薨 孫亮建興

元年十二月甲申大風震電是歲魏遣大衆三道來攻諸葛恪破其東興軍二軍亦退明年恪又攻新城喪衆大半還伏誅 孫休永安元年十一月甲午風四轉五復蒙霧連日是時孫綝一門五侯權逼吳王風霧之災與漢五侯丁傅同應也十二月丁卯夜有大風發木揚沙明日綝誅

晉武帝泰始五年五月辛卯朔廣平大風折木 咸寧元年五月下邳廣陵大風壞千餘家折樹木其月甲申廣陵司吾下邳大風折木 二年八月河間大風折木

太康二年五月濟南暴風折木傷麥六月高平大風折木發壞邸閣四十四區七月上黨又大風傷秋稼八年六月郡國八大風 九年正月京都風雹發屋拔樹後二年宮車晏駕 惠帝元康四年六月大風雨拔樹 五年四月庚寅夜暴風城東渠波浪殺人七月下邳大風壞廬舍九月鴈門新興太原上黨災風傷稼明年氏羌反叛大兵西討 九年六月颶風吹賈謐朝服飛數百丈明年謐誅十一月甲子朔京都連大風發屋折木十二月愍懷太子廢幽於許昌 永康元年二月大風拔木三月愍懷被害己卯喪柩發許昌還洛是日

又大風雷電幃蓋飛裂四月張華第舍颶風起折木飛繒折軸六七是月華遇害十一月戊午朔大風從西北來折木飛沙石六日止明年正月趙王倫篡位 永寧元年八月郡國三大風 永興元年正月乙丑西北大風 趙王倫建始元年正月癸酉趙王倫祠太廟災風暴起塵四合其年四月倫伏辜 元帝永昌元年七月丙寅大風拔木屋瓦皆飛八月暴風壞屋拔御道柳樹百餘株其風縱橫無常若風自八方來者是時王敦專權害尚書令刁協僕射周顛等故風縱橫若非一處也此臣易上政諸侯不朝之罰也十一月宮車晏駕 成

帝咸康四年三月壬辰成都大風發屋折木四月李壽  
 襲殺李期自立 康帝建元元年七月庚寅晉陵吳郡  
 災風 穆帝升平元年八月丁未冊立皇后何氏是日  
 疾風後桓元篡位乃降后為零陵縣君不睿之罰也  
 五年正月戊午朔大風 海西公太和六年二月大風  
 迅急是年被廢 孝武帝寧康元年三月京都大風火  
 大起是時桓溫入朝志在陵上帝又幼小人懷憂恐斯  
 不睿之徵也 三年三月戊申朔暴風迅起從丑上來  
 須臾逆轉從子上來飛沙揚礫 太元二年二月乙丑  
 朔暴風折木閏三月甲子朔暴風疾雨俱至發屋折木

三年六月長安大風拔苻堅宮中樹其後堅再南伐  
 遂有淝水之敗身戮國亡 四年八月丁未暴風揚沙  
 石 十二年正月壬午夜暴風七月甲辰大風折木  
 十三年十二月己未大風晝晦其後帝崩而諸侯違命  
 權奪於元顯禍成於桓元是其應也 十七年六月乙  
 未大風折木 安帝元興二年二月夜大風雨大航門  
 屋瓦飛落明年桓元篡位由此門入 三年正月桓元  
 出遊大航南風飄其輶上匹計反 下五計反蓋經三月而元敗  
 歸江陵五月江陵又大風折木是月桓元敗於崢嶸洲  
 身亦屠裂十一月丁酉大風江陵人多死者 義熙四

年十一月辛卯朔西北方疾風起 五年閏十一月丁

亥大風發屋明年盧循至蔡州 六年五月壬申大風

拔北郊樹樹蓋幾百年也并吹琅邪揚州二射堂俱倒

壞是日盧循大艦漂没甲戌又風發屋折木是歲冬王

師南討 九年正月大風白馬寺浮圖剎初轄反柱折壞

十年四月己丑朔大風拔木六月辛亥又大風拔木

七月淮北又大風壞屋舍皆為明年西討司馬休之應

也

宋文帝元嘉二十九年三月壬午大風拔木

齊武帝永明四年二月丙寅大風吳興偏甚樹葉皆赤

八年六月乙酉都下大風發屋

梁武帝天監六年八月戊戌大風折木京房易飛候日

角日疾風天下昏不出三月中兵必起是歲魏軍入鍾

離 元帝承聖三年十一月癸未帝閱武於南城北風

大急普天昏闇洪範五行傳曰人君瞽亂之應時帝既

平侯景公卿咸勸帝反丹陽帝不從又多猜忌有瞽亂

之行故天變應之以風是歲為西魏滅

陳文帝天嘉六年七月癸未大風起西南吹倒靈臺候

樓洪範五行傳以為大臣專恣之咎時太子冲幼安成

王頊專政帝不時抑損明年崩皇太子嗣位頊遂廢之

宣帝太建十二年六月壬戌大風吹壞臯門中闔九月夜又風發屋拔樹始興王叔陵專恣之應 後主至德中大風吹倒朱雀門 禎明三年六月丁巳大風自西北激濤水入石頭淮是時後主任司馬申誅戮忠諫沈客卿施文慶專行邪僻江總孔範等崇長淫縱杜塞聰明瞽亂之咎

北齊武成河清二年大風三旬乃止時帝委政佞臣和士開專恣日甚 後主天統三年五月大風晝晦發屋拔木明年帝崩 七年三月大風起西北發屋拔木五日乃止時高阿那瓌駱提婆等專恣之應

隋文帝開皇二十年十一月京師大風發屋拔木秦隴壓死者千餘 仁壽二年西河有胡人乘騾在道忽爲迴風所飄并一車上千餘尺乃墜皆碎焉京房易傳曰衆逆同志至德乃潛厥異風後二載漢王諒在并州潛謀逆亂車及騾騎之象也升空而墜顛殞之應也

唐高宗武德二年十二月壬子大風易巽爲風重巽以申命其及物也象人君誥命其鼓動於天地間有時飛沙揚塵怒也發屋拔木者怒甚也其占大臣專恣而氣盛衆逆同志君行蒙暗施於事則皆傷害故常風又飄風入宮闕一日再三若風聲如雷觸地而起爲兵將與

太宗貞觀十四年六月乙酉大風拔木 高宗咸亨  
 四年八月巳酉大風落太廟鴟尾 永隆二年七月雍  
 州大風害稼 弘道元年十二月壬午晦宋州大風拔  
 木 中宗嗣聖元年四月丁巳寧州大風拔木 武后  
 垂拱四年十月辛亥大風拔木 永昌二年五月丁亥  
 大風拔木 中宗神龍元年三月乙酉睦州大風拔木  
 崔元暉封博陵郡王也大風折其輅蓋 二年六月乙  
 亥滑州大風拔木 景龍元年七月郴州大風發屋拔  
 木八月宋州大風拔木壞屋舍 二年十月辛亥滑州  
 暴風發屋 三年三月辛未曹州大風拔木 元宗開

元二年六月京師大風發屋大木拔者十七八 四年  
 六月辛未京師陝華大風拔木 九年七月丙辰揚州  
 潤州暴風雨發屋拔木 十四年六月戊午大風拔木  
 發屋端門鴟尾盡落端門號令所從出也 十九年六  
 月乙酉大風拔木 二十二年五月戊子大風拔木  
 天寶十一載五月甲子東京大風拔木 十三載三月  
 辛酉大風拔木 代宗永泰元年三月辛亥大風拔木  
 大歷七年五月乙酉大風拔木 十年五月甲寅大  
 風拔木 德宗貞元元年七月庚子大風拔木 六年  
 四月甲申大風雨 八年五月巳未暴風發太廟屋瓦

毀門闕官署屋舍不可勝紀 十年六月辛未大風拔木 十四年八月癸未廣州大風壞屋覆舟 憲宗元和元年六月丙申大風拔木 三年四月壬申大風毀含元殿欄檻二十七間占爲兵起 四年十月壬午天有氣如煙臭如燔皮日昃大風而止 五年三月丙子大風毀崇陵上宮衙殿鴟尾及神門戟竿六壞行垣四十間 八年六月庚寅京師大風雨毀屋飄瓦人多壓死者丙申富平大風拔棗木千餘株 十二年春青州一夕暴風自西北天地晦冥空中有若旌旗狀屋瓦上如蹂躪聲有日者占之曰不及五年此地當大殺戮

穆宗長慶二年正月己酉大風霾十月夏州大風飛沙爲堆高及城堞 三年正月丁巳朔大風昏霾終日

四年六月庚寅大風毀延喜門及景風門 文宗太和

八年六月癸未暴風壞長安縣署及經行寺塔 九年

四月辛丑大風拔木萬株墮含元殿四鴟尾拔殿庭樹三壞金吾仗舍發城門樓觀內外三十餘所光化門西城十數雉壞 開成三年正月戊辰大風拔木 五年

四月甲子大風拔木五月壬寅亦如之七月戊寅亦如之 武宗會昌元年三月黔南大風飄瓦 懿宗咸通

六年正月絳州大風拔木有十圍者十一月己卯晦潼

關夜中大風山如吼雷河噴石鳴羣鳥亂飛重關傾側  
十二月大風拔木 僖宗乾符五年五月丁酉大風拔  
木 廣明元年四月甲申京師及東都汝州雨雹大風  
拔木 四年六月乙巳太原大風雨拔木千株害稼百  
里 昭宗光化三年七月乙丑洛州大風發屋拔木  
天復二年昇州大風發屋飛大木  
後漢隱帝乾祐三年閏五月癸巳京師西北風暴雨至  
戴婁門外壞營舍瓦木吹鄭門門扉起十餘步落拔大  
樹數十震死者六七人平地水深尺餘其年十一月隱  
帝遇害

宋太祖乾德二年五月揚州暴風壞軍營舍僅百區  
三年六月揚州暴風壞軍營及城上敵棚 開寶二年  
三月車駕駐太原城下大風一夕而止 八年十月廣  
州颶風起一晝夜雨水二丈餘海爲之漲飄失舟 九  
年四月宋州大風壞甲仗庫城樓軍營民舍凡四千五  
百九十六區 太宗太平興國二年六月曹州大風壞  
濟陰縣廨及軍營 四年八月泗州大風浮梁竹竿鐵  
索斷華表石柱折 六年九月高州大風壞廨宇民舍  
五百區 七年八月瓊州颶風壞城門州署民舍殆盡  
八年九月太平軍颶風拔木壞廨宇民舍千八十七

區十月雷州颶風壞廩庫民舍七百區 九年八月白  
州颶風壞州廨民舍 端拱二年京師暴風起東北塵  
沙暄日人不相辨 淳化二年五月通利軍大風害稼  
三年六月丁丑黑風自西北起天地晦暝雷震有頃  
乃止先是都下大熱疫死者衆及此風至疾疫遂止  
至道二年八月潮州颶風壞州廨營寨漂刀魚舟 真  
宗咸平元年八月涪州大風壞城舍 四年八月丙子  
京師暴風 景德二年六月甲午大風吹沙折木八月  
福州海上有颶風壞屋舍 三年七月丙寅京師大風  
四年三月甲寅夕京師大風黃塵蔽日自大名府歷

京畿害桑稼唐州尤甚 大中祥符二年四月乙未大  
風起京師西北連日不止九月無爲軍城北暴風雨晝  
晦不可辨拔木壞城門營壘民舍壓死千餘人遣內侍  
張景宣馳驛卹視壞屋者無出來年夏租壓死者家賜  
米一斛無主者官瘞之 五年八月京師大風 七年  
二月戊辰京師大風揚沙礫是日百官習儀恭謝壇有  
隨仆者 六年六月辛亥京師大風起已位吹沙揚塵  
天禧二年正月永州大風發屋拔木數日止 三年  
五月徐州利國監大風起西南壞廬舍二百餘區壓死  
十二人 四年四月丁亥大風起西北飛沙折木晝晦

數刻止五月乙卯大風起西北有聲折木吹黃塵蔽天  
按占並主陰謀姦邪是秋內侍周懷政坐妖亂伏誅

仁宗天聖六年二月庚辰大風晝暝 九年十二月辛

酉大風三日 景祐元年九月甲寅夜漏上風自丑起

有聲擺木鳴條 二年六月戊寅平明風自未來占者

以爲百穀豐衍之候 康定元年大風晝暝經刻乃復

皇祐四年七月丁巳大風拔木 神宗熙寧四年二

月辛巳京東自濮州至河北旁邊大風異常百姓驚恐

四月癸亥京師大風霾 六年四月北京館陶縣黑風

九年十一月潮州海陽潮陽二縣颶風海潮害民田

稼 十年六月恩州武城縣大風壞縣解知縣李愈妻

主簿寇宗奭妻之母壓死七月温州大風雨漂城樓官

舍 元豐四年六月邕州颶風壞城樓官私廬舍七月

甲午夜泰州海風作繼以大雨浸州城壞公私廬舍數

千間又通州靜海縣大風雨毀官私廬舍二千七百六

十三楹潤州丹陽縣大風雨溺居民毀廬舍丹徒縣大

風潮飄蕩沿江廬舍損田稼 五年八月朱崖軍颶風

毀廬舍 哲宗元祐八年二月末京師風霾大寒是歲

福建兩浙海風駕潮害民田 紹聖元年秋蘇湖秀等

州海風害民田 欽宗靖康元年正月望夜大風起西

北有聲吹沙走石盡明日乃止二月戊申大風起東北揚塵翳空三月己巳夜五更大風乍慢乍急聲如叫怒十一月丁亥大風發屋折木閏十一月甲寅大風起北方雪繼作積數尺連夜不停二年正月己亥天氣昏曠狂風迅發竟日夜西北陰雲中如有火光二丈餘闊數尺時時見庚戌大風雨二月乙酉大風折木晚尤甚三月丁酉風霾己亥大風四月庚申朔大風吹石折木辛酉北風益甚苦寒高宗建炎元年二月乙酉大風拔木紹興二十八年七月壬戌平江府大風雨駕潮漂溺數百里壞田廬三十二年七月戊申大風拔木

温州大風壞屋覆舟孝宗隆興元年浙東西郡國風水傷稼二年八月大風雨飄蕩田廬乾道二年八月丁亥温州大風雨駕海潮殺人覆舟壞廬舍五年十月台州大風水壞田廬八年六月丙辰惠州颶風壞海艦三十餘時樞密院調廣東經略司水軍四艦覆其三死者百三十餘人淳熙三年六月大風連日四年九月明州大風駕潮壞定海鄞縣海岸七千六百餘丈及田廬軍壘六月乙巳夜福州福清縣興化軍大風雨壞官舍民居倉庫及海口鎮人多死者六年十一月鄂州大風覆舟溺人甚衆七年二月江陵府大

風焚溺岸舟死者尤衆 十年八月辛酉雷州颶風大作駕海潮飄溢殺人林木田禾皆折 光宗紹熙二年二月癸酉温州瑞安縣大風仆屋拔木殺人 四年七月興化軍海風害稼 五年七月乙亥行都大風拔木壞舟甚衆紹興府秀州大風駕海潮害稼秋明州颶風駕海潮害稼十月甲戌行都大風拔木 寧宗慶元二年六月壬申台州暴風雨駕海潮壞田屋 六年夏常風當夏而寒 嘉定二年七月壬辰台州大風雨駕海潮壞屋殺人 三年八月癸酉大風連日大木皆拔折禾穗墮果實上露禱至於丙子乃息後御史朝陵於紹

興府歸奏風壞陵殿宮墻六十餘所折陵木二千餘株 六年十二月餘姚縣風潮壞海堤亘八鄉 七年正月庚辰江州燈夕黑雲暴風暮作郡治游人相踐死於門者二十餘人十一月二日甲寅大風 十六年秋大風拔木害稼 十七年秋福州颶風大作壞田損稼冬鄂州暴風壞戰艦二百餘壽昌軍壞戰艦六十餘江州興國軍亦如之

### 恒陰

漢昭帝元平元年四月崩亡嗣立昌邑王賀賀卽位天陰晝夜不見日月賀欲出光祿大夫夏侯勝當車諫曰

天久陰而不雨臣下有謀上者陛下欲何之賀怒縛勝以屬吏師古曰屬委也音之欲反吏白大將軍霍光光時與車騎將軍張安世謀欲廢賀光讓安世以為泄語安世實不泄召問勝勝上洪範五行傳曰皇之不極厥罰常陰時則有下人伐上不敢察察言臣瓚曰不敢察察明言之故云臣下有謀光安世讀之大驚以此益重經術士後數日卒共廢賀此常陰之明效也京房易傳曰有蜺蒙霧霧上下合也蒙如塵雲蜺日旁氣也其占曰后妃有專蜺再重赤而專至衡旱孟康曰專員也若五月再重赤而員至十一月旱也妻不壹順黑蜺四背又白蜺雙出日中妻以貴高夫茲謂擅陽蜺四方日

光不陽解而温服虔曰蒙氣解而温內取茲謂禽服虔曰人君內取如禮記聚麀之聚瓚說非蜺如禽在日旁以尊降如茲謂薄嗣蜺直而塞六辰廼除夜星見而赤韋昭曰六辰謂從卯至申女不變始茲謂乘夫孟康曰始高貴於夫終行此不變也蜺白在日側黑蜺果之氣正直師古曰果謂干之也妻不順正茲謂擅陽蜺中窺貫而外專夫妻不嚴茲謂媾韋昭曰媾言媾慢也師古曰音先列反蜺與日會婦人擅國茲謂頃師古曰頃謂日頃蜺白貫日中赤蜺四背服虔曰蜺背日適不答茲謂不次服虔曰言適妻不見答也臣瓚曰夫不接妻為不答師古曰適讀曰嫡答報也言妻有承順之心不見報答也一日答對也言不以恩意接對之蜺直在左蜺交在右取於不專茲謂危嗣蜺抱日兩未及

君淫外茲謂亡蜺氣左日交於外取不達茲謂不知蜺

白奪明而大温温而雨師古曰取讀日聚尊卑不別茲謂蝶蜺

三出三已三辰除韋昭曰若從寅至辰也蜺旦見西晏則雨除則日出且雨

臣私祿及親茲謂罔辟韋昭曰辟君也師古辟音壁其下並同厥異蒙其

蒙先大温已蒙起日不見行善不請於上茲謂作福蒙

一日五起五解辟不下謀臣辟異道茲謂不見上蒙下

霧風三變而俱解立嗣子疑茲謂動欲蒙赤日不明德

不序茲謂不聰蒙日不明温而民病德不試空言祿師古

日試用也茲謂主窳臣天孟康曰謂君情窳用人不以次第為天也師古曰窳音庾蒙起

而白君樂逸人茲謂放蒙日青黑雲夾日左右前後行

過日公不任職茲謂怙祿蒙三日又大風五日蒙不解

利邪以食茲謂閉上蒙大起白雲如山行蔽日公懼不

言道茲謂閉下蒙大起日不見若雨不雨至十二日解

而有小雲蔽日祿生於下茲謂誣君蒙微而小雨已乃

大雨下相攘善茲謂盜明蒙黃濁下陳功求於上茲謂

不知蒙微而赤風鳴條解復蒙下專刑茲謂分威蒙而

日不得明大臣厭小臣茲謂蔽蒙微日不明若解不解

大風發赤雲起而蔽日衆不惡惡茲謂閉蒙尊卦用事

孟康曰尊卦乾坤也臣瓚曰京房謂方伯卦震兌坎離也師古曰孟說是也三日而起日不

見漏言亡喜茲謂下厝用師古曰厝音干各反蒙微日無光有雨

雲雨不降廢忠惑佞茲謂亡蒙天先清而暴蒙微而日  
不明有逸民茲謂不明蒙濁奪日光公不任職茲謂不  
謂蒙白三辰止則日青青而寒寒必雨忠臣進善君不  
試茲謂遏師古曰試用也蒙先小雨雨已蒙起微而日不明惑  
衆在位茲謂覆國蒙微而日不明一溫一寒風揚塵知  
佞厚之茲謂庠蒙甚而溫君臣故弼茲謂悖師古曰弼猶相與也  
也悖惑也厥災風雨霧風拔木亂五穀已而大霧庶正蔽惡  
茲謂生孽災厥異霧此皆陰雲之類云  
後漢順帝陽嘉二年郎顛上書云正月以來陰闇連日  
久陰不雨亂氣也得賢不用猶久陰不雨也

吳孫亮太平三年自八月沉陰不雨四十餘日是時將  
誅孫綝謀泄九月戊午綝以兵圍宮廢帝爲會稽王此  
常陰之罰也 孫皓寶鼎元年十二月太史奏久陰不  
雨將有陰謀孫皓驚懼時陸凱等謀因其謁廟廢之及  
出留平領兵前驅凱先語平平不許是以不果皓旣肆  
虐羣下多懷異圖終至降亡

隋文帝開皇二十年十月久陰不雨劉向曰王者失中  
臣下蔽君明則雲陰時獨孤后與楊素譖太子勇廢之  
唐武后長壽元年九月戊戌黃霧四塞霧者百邪之氣  
爲陰冒陽本於地而應於天也黃爲土土爲中宮 長

安四年自九月霖雨陰晦至於神龍元年正月 中宗  
神龍二年三月乙巳黃霧四塞 景龍二年八月甲戌  
黃霧昏濁不雨 三年正月丁卯黃霧四塞十一月甲  
寅日入後昏霧四塞經二日乃止占曰霧連日不解其  
國昏亂 元宗開元五年正月戊辰昏霧四塞 天寶  
十四載冬三月常霧昏暗十步外不見人是謂晝昏占  
曰有破國 肅宗至德二載四月賊將武令珣圍南陽  
白霧四塞 上元元年閏四月大霧占曰兵起 德宗  
貞元十年三月乙亥黃霧四塞日無光 二十年秋  
連月陰霑 憲宗元和十五年正月庚辰至於丙申晝

常陰晦微雨雪夜則晴霽占曰晝霧夜晴臣志得申  
懿宗咸通九年十一月龐勛圍徐州甲辰大霧昏塞至  
於丙午 十四年七月靈州陰晦 僖宗乾符六年秋  
多雲霧晦冥日且及禺中乃解 光啓元年秋河東大  
雲霧明年夏晝陰積六十日 二年十一月淮南陰晦  
雨雪至明年二月不解 昭宗景福二年夏連陰四十  
餘日霧 光化四年冬昭宗在東內武德門煙霧四塞  
門外日色皎然

宋高宗建炎三年六月久陰上謂輔臣曰占爲陰盛下  
有陰謀語在常雨 紹興三年自正月陰晦陽光不舒

者四十餘日 八年三月乙卯晝蒙京房易傳曰霧上下合也蒙如塵雲四月積雨方止氛霧四塞晝日無光近常陰也 孝宗隆興二年六月沈陰不解者月餘 乾道二年十一月天久晦陰 五年正月甲申晝蒙 六年五月連陰六月日青無光 淳熙六年十一月乙丑晝蒙 十三年正月丁亥亦如之 寧宗慶元六年十二月辛卯 嘉定三年正月丙午 十年正月乙未 十三年三月壬辰皆晝蒙

夜妖

春秋僖公十五年九月己卯晦震夷伯之廟師古曰夷伯司空無

駭之後本魯公族也號展氏 劉向以為晦暝也震雷也夷伯世大夫

正晝雷其廟獨冥師古曰冥暗也 天戒若曰勿使大夫世官將

專事暝晦明年公子季友卒果世官師古曰謂季友之孫行父仍執政專

國自此以後常為卿 政在季氏至成公十六年正月甲午晦正晝

皆暝陰為陽臣制君也成公不寤其冬季氏殺公子偃

師古曰為季文子所殺也已解於上 季氏萌於僖公師古曰萌謂草木始生也言其始有威權

大於成公此其應也董仲舒以為夷伯季氏之孚也師古

曰孚信也所信任之臣也 陪臣不當有廟震者雷也晦暝雷擊其廟

明當絕去僭差之類也向又以為此皆所謂夜妖者也

劉歆以為春秋及朔言朔及晦言晦人道所不及則天

震之展氏有隱隱故天加誅於其祖夷伯之廟以譴告之也 成公十六年六月甲午晦晉侯及楚子鄭伯戰于鄆陵皆月晦云

漢高祖二年東伐楚入彭城項羽以精兵擊漢軍大破之圍漢王三匝大風起揚沙石晝晦楚軍大亂漢王得與數十騎遁去

魏高貴鄉公正元二年正月戊戌景帝討母邱儉大風晦暝行者皆頓伏近夜妖也劉向日晝晦而暝陰爲陽臣制君也 元帝景元三年十月京師大震晝晦此夜妖也劉向春秋說云天戒若曰勿使大夫世官將令專

事暝晦公室卑矣魏見此妖晉有天下之應也

晉武帝泰始三年三月丁未晝昏 懷帝永嘉四年十一月辛卯晝昏至於庚子此夜妖也後年劉曜寇洛川王師頻爲賊所敗帝蒙塵於平陽 孝武帝太元十三年十二月乙未大風晦暝其後帝崩而諸侯違命干戈內侮權奪於元顯禍成於桓元

苻堅時大風晝暝恒星北白見太史以爲西南國亡明年堅陷蜀

梁元帝承聖二年十月丁卯大風晝暝天地昏暗近夜妖也京房易飛候曰羽日風天下昏人大疾不然多寇

盜三年爲西魏所滅

陳後主禎明三年正月朔旦雲霧晦暝入鼻酸辛後主昏昧近夜妖也時北軍臨江柳莊任蠻奴並進中欵後主惑佞臣孔範之言而昏闇不能用以至覆亡

東魏孝靜武定四年冬大霧六日晝夜不解洪範五行傳曰晝而晦冥若夜者陰侵陽臣將侵君之象也明年元瑾劉思逸謀殺大將軍之應

北周靜帝大象二年尉迥敗於相川坑其黨與數萬人於遊豫園其處每聞鬼夜哭聲洪範五行傳曰哭者死亡之表近夜妖也鬼而夜哭者將有死亡之應京房易

飛侯曰鬼夜哭國將亡明年周氏王公皆見殺周室亦亡

隋文帝仁壽中仁壽宮及長城之下數聞鬼哭尋而獻后及帝相次而崩於仁壽宮 煬帝大業八年楊元感作亂於東都尚書樊子蓋坑其黨與長夏門外前後數萬洎於末年數聞其處鬼哭有呻吟之聲與前占同其後王世充害越王侗於洛陽

唐文宗太和九年十一月戊辰晝晦 懿宗咸通七年九月辛卯朔天闇 僖宗乾符二年二月宣武境內黑風雨土 昭宗天祐元年閏四月乙未朔大風雨土

後周世宗顯德六年六月辛卯辰巳間京師天地晦暝  
澍雨驟降雨中有腥氣其日世宗崩

宋太宗端拱二年京師暴風起東北塵沙暄日人不相  
辨 淳化三年六月丁丑黑風自西北起天地晦冥雷  
震有頃乃止 真宗大中祥符二年九月無爲軍城北  
暴風雨晝晦不可辨拔木壞城門營壘民舍 仁宗天  
聖六年二月庚辰大風晝暝 康定元年三月丙子大  
風晝暝經刻乃復 嘉祐八年十一月丙午大風霾  
英宗治平二年二月乙巳大風晝晦 四年正月庚辰  
朔大風霾是日羣臣上尊號廷中仗衛皆不能整時帝

不豫越七日崩 神宗熙寧四年四月京師大風霾  
欽宗靖康二年正月己亥天氣昏暄風迅發竟日丁未  
霧氣四塞人對面不相視 高宗建炎元年三月丁酉  
汴京風霾日無光劉向日正晝而暝陰爲陽臣制君也  
是日張邦昌僭位 二年七月癸未風雨晝晦是日東  
京留守宗澤薨十一月甲子北京大霧四塞是夕城陷  
三年三月上發温州航海乙丑御舟次松門海中白  
霧晝晦近夜妖也 紹興八年三月甲寅晝晦日無光  
陰霧四塞乙卯晝夜雲氣昧濁 十一年主管成都等  
路茶事馮康國言三月庚申虜居長安晝晦面不相睹

虜亡之象也 孝宗乾道五年正月甲申晝霾四塞  
 淳熙五年四月丁丑塵霾晝晦日無光 寧宗慶元元  
 年二月己卯晝暝四方昏塞 三年二月丁卯晝晦昏  
 霧四塞 嘉定十年正月乙未晝霾二月癸巳日蒙無  
 光

文獻通考卷第三百六

文獻通考卷第三百七

鄱 陽 馬 端 臨 貴 與 著

物異考十三

雷震

成王時秋大熟未穫天大雷電以風禾盡偃大木斯拔  
 邦人大恐

秦始皇五年冬雷

漢惠帝五年冬十月雷 景帝六年十二月雷霖雨

昭帝元鳳五年十一月大雷

王莽始建國二年十二月雷

後漢光武建武七年遼東冬雷草木實 和帝元興元

年冬十一月壬午郡國四冬雷時皇子數不遂皆隱之

民間是歲宮車晏駕殤帝生百餘日立以為君帝兄平

原王有疾不立卒皆天無嗣 殤帝延平元年九月乙

亥陳留雷有石隕地四 安帝永初六年十月丙戌郡

國六冬雷京房占曰天冬雷地必震又曰教令擾又曰雷以十一月起黃鍾二月大雷八月闔藏此

以春夏殺無辜不須冬刑致災蟄蟲出行不救之則冬温風以其來年疾病其救也恤幼孤振不足議獄刑貫

謫罰災則消矣古今注曰明帝永平七年十月丙子越嶲雷 七年十月戊子郡國

三冬雷 元初元年十月癸巳郡國三冬雷 三年十

月辛亥汝南樂浪冬雷 四年十月辛酉郡國五冬雷

六年十月丙子郡國五冬雷 永寧元年十月郡國

七冬雷 建元元年十月郡國七冬雷 延光四年郡

國十九冬雷是時太后攝政上無所與太后既崩阿母

王聖及皇后兄閭顯兄弟更秉威權上遂不親萬機從

容寬仁任臣下古今注曰順帝永和四年四月戊午雷震擊高廟世祖廟外槐樹 桓

帝建和三年六月乙卯雷震憲陵寢屋先是梁太后聽

兄冀枉殺李固杜喬 靈帝熹平六年冬十月東萊冬

雷 中平四年十二月晦雨水大雷電雹 獻帝初平

三年五月丙申無雲而雷 四年五月癸酉無雲而雷

魏明帝景初中洛陽城東橋城西洛水浮橋桓楹同日

三處俱時震尋又震西城上候風木飛鳥時勞役大起  
帝尋晏駕

吳孫權赤烏八年夏震宮門柱又擊南津大橋桓楹

孫亮建興元年十二月朔大風震電是月又雷雨義同  
前說亮終廢

晉武帝太康六年十二月甲申朔淮南郡震電 七年

十二月己亥毘陵雷電南沙司鹽都尉戴亮以聞 十

年十二月癸卯廬江建安雷電大雨 惠帝永康元年

六月癸卯震崇陽陵標西南五百步標破爲七十片是  
時賈后陷害鼎輔寵樹私戚與漢桓帝時震憲陵寢同

事也后終誅滅 永興二年十月丁丑雷震 懷帝永

嘉四年十月震電 愍帝建興元年十一月戊辰會稽

大雨震電己巳夜赤氣曜於西北是夕大雨震電庚午

大雪按劉向說雷以二月出八月入今此月震電者陽

不閉藏也旣發泄而明日便大雪皆失節之異也是時

劉淵僭號平陽李雄稱制於蜀九州幅裂西京孤微爲

君失時之象也赤氣赤祥也 元帝太興元年十一月

乙卯暴雨雷電 永昌二年七月丙子朔雷震太極殿

柱十二月會稽吳郡雷震電 成帝咸和元年十月己

巳會稽郡大雨震 三年六月辛卯臨海大雷破郡府

內小屋柱十枚殺人九月二日壬午立冬會稽雷電

四年十一月吳郡會稽震電 穆帝永和七年十月壬

午雷雨震電 升平元年十一月庚戌雷乙丑又雷

五年十月庚午東南方雷 孝武帝太元五年六月甲

寅雷震含章殿四柱并殺內侍二人 十年十二月雷

聲在南方 十四年七月甲寅雷震燒宣陽門西柱

安帝隆安二年九月壬辰雷雨 元興三年永安皇后

至自巴陵將設儀導入宮天雷震人馬各一俱殪

於計反

焉 義熙四年十一月辛卯朔西北方疾風發癸丑雷

六月甲寅雷震太廟破東鴟尾徹柱又震太子西池合

堂是時帝不親丞嘗故天震之明簡宗廟也西池是明  
帝爲太子時所造次故號太子池及安帝多病患無嗣  
故天震之明無後也 六年正月甲寅雷又雪十二月

壬辰大雷 九年十一月甲戌雷乙亥又雷

陳宣帝大建元年七月大雨震萬安陵華表又震慧日  
寺刹瓦官寺重閣門下一女子震死京房易飛候曰雷  
雨霹靂邱陵者逆先人令爲火殺人者人君用讒言殺  
正人時蔡景歷以奸邪任用又僕射陸繕以讒毀獲譴  
發病而死 十年三月震武庫時帝好兵頻年北伐內  
外虛竭將士勞弊旣克淮南又進圖彭汴毛喜切諫不

納由是吳明徹諸軍皆沒遂失淮南之地武庫者兵器之所聚也而震之天戒若曰宜戢兵以安百姓帝不悟又大興軍旅其年六月又震太皇寺刹莊嚴寺露槃重陽閣東樓鴻臚府門太皇莊嚴二寺陳國奉佛之所重陽閣每所遊宴鴻臚賓客禮儀之所在而同歲震者天戒若曰國威已喪不務修德後必有恃佛道耽宴樂棄禮儀而亡國者陳之君臣竟不悟至後主之代災異屢起懼而於太皇寺捨身爲奴以祈真助不恤國政耽酒色棄禮法不修鄰好以取敗亡

北齊後主武平元年夏震丞相段孝先南門柱京房易傳曰震及貴臣門及屋者不出二年佞臣被誅後歲和士開被戮

唐太宗貞觀十一年四月甲子震乾元殿前槐樹震耀天之威怒以象殺戮槐古者三公所樹也 武后延載元年六月淮南偃師縣李村村有震電入民家地震裂闊丈餘長十五里深不可測所裂處井廁相通或衝冢墓柩出平地無損李國姓震電威刑之象地陰類也 證聖元年正月丁酉雷雷者陽聲出非其時臣竊君柄之象 長安四年五月丁亥震雷大風拔木人有震死者 代宗永泰元年二月甲子夜震霆自是無雷至六

月甲申乃雷 大歷十年四月甲申雷電暴風拔木飄  
瓦人有震死者京畿害稼者七縣 德宗建中元年九  
月乙卯雷 四年四月丙子東都畿汝節度使哥舒曜  
攻李希烈進軍至潁橋大雨震電人不能言者十三四  
馬驢多死 貞元十四年五月己酉夏至始電 憲宗  
元和十一年冬雷 穆宗長慶二年六月乙丑大風震  
電落太廟鴟尾破御史臺樹 文宗太和八年七月辛  
酉定陵臺大雨震廡下地裂二十有六步占曰土庶分  
離大臣專恣不救大敗 武宗會昌三年五月甲午始  
雷 懿宗咸通四年十二月震雷 僖宗乾符二年十

二月震雷雨雹 昭宗乾寧四年李茂貞遣將符道昭  
攻成都至廣漢震雷有石隕於帳前

宋太祖建隆三年四月癸巳宿州日無雨雷霆暴作軍  
校傅韜震死是夜半風雷起於京師開封縣署役夫劉  
延嗣萬進震死頃之進復蘇言有烟焰自牖入室因駭  
仆徧體焦灼 乾德二年正月辛巳雷聲起京師西南  
東行有電五月戊戌大名府大雨雷震焚橐聚 四年  
七月海州雷震長吏廳土木多圯傷刺史梁彥超 開  
寶七年六月易州雷震死耀武軍士八人 八年八月  
邛州延貴鎮震死民費貴及其四子 太宗太平興國

二年七月瀛州景城縣霆震死牛商馮又 端拱二年  
八月興化軍民劉政震死有文在胷中曰大不孝九月  
丙午夜半雷聲起京師西北 淳化三年七月泗州大  
風雨震僧伽塔柱 至道元年三月甲戌京師雷未發  
聲召司天監丞趙昭益問之云按占雷不發聲寬政之  
應也七月泗州大風雨雷震僧伽塔及壞鐘樓 真宗  
咸平元年正月戊寅京師西北有雷電十一月瀛州順  
安軍並東北有雷 三年十月黃州西北雷聲如盛夏  
時十一月真定府東南雷 四年十月乙巳京師西南  
雷電閏十二月大名府雷 五年九月辛亥京師雷

六年十一月甲午京師暴雷震司天言國家發號布德  
未及黎庶時議改元肆赦詔宰相增廣條目采民病悉  
除之 景德三年九月丙寅夕京師大震電 大中祥  
符元年正月癸未京師西北雷 五年十二月巳巳京  
師西北雷電 九年五月殿侍張信奉南海祝版乘驛  
至唐州震死 徽宗大觀三年十月戊子大雷電雨  
高宗紹興五年十月丁巳雷 六年十月丙午雷 九  
年十月丁卯雷 十一年十一月巳酉雷 十五年十  
月辛卯雷十二月甲寅雷 十六年温州大雷電龍翔  
寺震死者六人 十九年十月甲寅雷 二十一年二

月辛未南安軍大雷電大庾縣治震死者四人十一月  
 辛未夜震雷十二月癸酉雷 二十二年十二月戊寅  
 巳卯雷 二十六年十二月甲子雷 孝宗乾道二年  
 十一月戊辰日南至大震雷 癸酉策免相 葉顥魏杞 七年正月  
 丙戌雷自是迄夏無雷 淳熙十二年十一月戊午雷  
 十二月丁丑雷 十三年正月雷後三十五日有雪  
 十四年十一月冬雷 十六年七月大雷震太廟齋殿  
 光宗紹熙二年正月雷雪 三年正月庚戌朔雷  
 四年十一月巳卯日南至辛巳雷 五年十月大雷震  
 寧宗慶元元年春無雷 開禧三年十月辛未雷

嘉定三年十月雷 五年七月雷雨震太廟鴟吻十月  
 冬雷 六年閏九月雷電 十年正月朔雷 十一年  
 九月辛巳明堂禮成肆赦雷電 十四年十六年俱冬  
 雷

物自鳴

即五行志所謂鼓妖也無形有聲無雲而雷謂之  
 鼓妖今所載凡不當鳴而鳴者皆入焉

左傳僖公三十二年十二月巳卯晉文公卒庚辰將殯  
 於曲妖出絳柩有聲如牛劉向以為近鼓妖也喪凶事  
 聲如牛怒象也將有急怒之謀以生兵革之禍時秦穆

公遣兵襲鄭晉要之峭阨以敗其師晉不惟舊而聽虐  
謀結怨強國四被秦寇禍流數世凶惡之效也

考王十三年晉無雲而雷 威烈王三年十一月晉有  
火下於北方其聲如鼓

秦二世元年天無雲而雷劉向以為雷當託於雲猶君  
託於臣陰陽之合也二世不恤下下民怨叛是歲陳勝  
起趙高作亂秦遂亡一曰易震為雷為額不恭也

漢成帝元延元年四月丁酉無雲而有雷聲光耀耀四  
面下至地止 哀帝建平二年四月乙亥朔御史大夫  
朱博為丞相少府趙元為御史大夫臨延登受策有大

聲如鐘鳴 師古曰延入而登殿也漢舊儀云丞殿中郎

吏陞者皆聞焉 師古曰陞者謂上以問黃門侍郎揚雄

李尋尋對曰洪範所謂鼓妖也師法以為人君不聰為  
眾所惑空名得進則有聲無形不知所從生其傳曰歲

月日之中則正卿受之今以四月日加辰已有異是為  
中焉正卿謂執政大臣也宜退丞相御史以應天變然

雖不退不出期年其人自蒙其咎 師古曰期年十二月

揚雄亦以為鼓妖聽失之象也朱博為人彊毅多權謀

宜將不宜相恐有凶惡亟疾之怒 師古曰亟急八月博

元坐為奸謀博自殺元減死論京房易傳曰令不修木

下不安金母故自動若有音 延壽元年九月孝元廟

殿門銅龜蛇鋪首鳴 如淳曰門鋪首作龜蛇之形而鳴呼也門之鋪首所以銜環者也

王莽天鳳三年十月戊辰王路朱鳥門鳴晝夜不絕

崔發等曰虞帝闢四門達四聰門鳴者明當修先聖

之禮招四方之士也於是令羣臣皆賀所舉四行從

朱鳥門入而對策焉

後漢獻帝建安七八年中長沙醴陵有大山常大鳴如

牛响聲積數年後豫章賊攻沒醴陵縣殺掠吏民

晉惠帝元康元年三月有聲若牛出許昌城十二月廢

愍懷太子幽於許宮明年賈后遣黃門孫憲殺太子擊

以藥杵聲聞於外是其應也

蘇峻在歷陽外營將軍鼓自鳴如人弄鼓者峻手自

破之曰我鄉土時有此則城空矣俄而作亂夷滅此

聽不聰之罰也

石季龍末洛陽城西北九里石牛在青石趺 甫於上反

忽鳴聲聞四十里季龍遣人打落兩耳及尾鐵釘釘

上音丁下 四脚尋而季龍死 都定反

孝武太元十五年三月己酉朔東北方有聲如雷按劉

向說以為雷當託於雲猶君託於臣無雲而雷此君不

恤於下下人將叛之象也及帝崩而天下漸亂孫恩桓

元交陵京邑

吳興長城夏架山有石鼓長丈餘面徑三尺所下有盤石爲足鳴則聲如金鼓三吳有兵至安帝隆安中大鳴後有孫恩之亂

齊武帝永明十一年七月上不豫徙御延昌殿始登階而殿屋鳴吒上惡之至八月崩

梁武帝天監四年十一月天清明西南有電光有雷聲二洪範五行傳曰雷霆託於雲猶君託於人也君不恤天下故人怨叛是歲交州刺史李凱反 十九年九月西北隱隱有聲如雷赤氣下至地是歲盜殺東莞瑯琊

二郡守以胸山引魏軍 中大通六年十二月西南有

聲如雷其年北梁州刺史蘭欽舉兵反

陳宣帝太建二年十二月西北有聲如雷其年湘州刺史華皎舉兵反

北齊文宣天保四年四月西南有聲如雷時帝不恤天下興師旅

後周武帝建德六年正月西方有聲如雷未幾吐谷渾寇邊

隋文帝開皇十四年正月旦廓州連雲山有聲如雷時五羌反叛侵邊 二十年無雲而雷京房易飛候曰國

將易君下人不靜小人先命國凶有兵甲後數歲帝崩  
漢王諒舉兵反是年十一月京都大風地大震鼓皆應  
淨刹寺鐘三鳴佛殿門鎖自開銅像自出戶外鐘鼓自  
鳴者近鼓妖也揚雄以爲人君不聰爲衆所惑空名得  
進則鼓妖見時獨孤后干政楊素權傾人主帝聽二人  
之讒黜高潁廢太子勇晉王鈞虛名而見立 煬帝大  
業中滏陽石鼓頻歲鳴其後天下大亂兵戎並起

唐高祖武德二年三月太行山聖人崖有聲占曰有寇  
至 三年二月丁丑京師西南有聲如崩山近鼓妖說  
者以爲人君不聰爲衆所惑則有聲無形不知所從生

武后天授元年九月檢校內史宗秦客拜日無雲而  
震近鼓妖也 元宗開元二十八年六月吐蕃圍安戎  
城斷水路城東山鳴石圻湧泉二 德宗貞元十三年  
六月丙寅天晦街鼓不鳴 僖宗中和二年十月西北  
方無雲而雷 昭宗天復三年十月甲午有大聲出於  
宣武節度使廳事近鼓妖也

後唐莊宗同光三年九月丁未夜徧天陰雲北方有聲  
如雷雉皆雊俗呼曰天狗墜

宋高宗紹興七年五月汴京無雲而雷是歲僞齊亡  
三十年十月庚戌晝漏半無雲而雷癸亥日過中無雲

而雷 孝宗淳熙十四年六月甲申昧爽上將禱雨太  
一宮乘輿未駕有大聲發自內及於和寧門人馬辟易  
相踐藉有失巾屨者近鼓妖也 光宗紹熙二年温州  
瑞安縣感應侯廟鼓自鳴後曰邑有巨寇昇鼓去先是  
鼓上有書曰鼓響盜長鼓壞盜敗寇果以旬日就僂與  
晉志隆安石鼓鳴孫恩同占

### 物自動

卽五行志所謂木沴金也志中惟載金石自動今  
所載凡非動物而自動者皆入焉

周威烈王二十三年九鼎震金震木動之也時周室衰

微號令不從以亂金氣鼎者宗廟之寶器宗廟將遷故  
震動也是歲晉三卿韓魏趙分晉地王命以爲諸侯其  
後秦遂滅周而取九鼎九鼎之震木沴金失衆心

漢成帝元延元年正月長安章城門門牡自亡

晉灼曰西出南

頭第一門也牡是出籥者師古曰牡所以下閉者也亦以鐵爲之非出籥也

京房易傳曰饑

而不損茲謂秦厥災木厥咎牡亡妖辭曰關動牡飛辟  
爲亡道臣爲非厥咎亂臣謀篡

易妖傳變辭

故谷永對曰章

城門通路寢之路函谷關距山東之險城門關守國之  
固固將去焉故牡飛也 平帝元始元年二月乙未義

陵寢神衣在柙中

哀帝陵也

丙申旦衣在外牀上寢令以急

變聞祠以太牢

王莽地皇元年七月社陵便殿乘輿虎文衣廢藏在室匣中者出自樹立堂上良久乃委地吏卒見者以聞莽惡之

魏齊王正始末河南尹李勝治廳事有小材激墮搥受符石彪頭斷之此木沴金也勝後旬日而敗

晉惠帝元康八年五月郊禘壇石中破爲二此木沴金也郊禘壇求子之神位無故自毀太子將危之妖也明年愍懷廢死 孝武帝太元十年四月謝安出鎮廣陵始發石頭金鼓無故自破木沴金之異也天戒若曰安徒揚經畧之聲終無其實鉦鼓不用之象也月餘以疾還而薨

梁武帝大同十二年曲阿建陵隧口石騏驎動木沴金也動者遷移之象天戒若曰園陵無主石麟將爲人所移也後竟國亡 太清元年帝捨身光嚴重雲殿游仙化生皆震動三日乃止當時謂之祥瑞識者以爲非動而動在洪範爲妖以此石虎之敗殿壁畫人頸皆縮入頭之類又送辟邪二於建陵左雙角者至陵所右獨角者將引於車上振躍者三車兩轅俱折因換車未至陵二里所又躍者三每一振則車側人莫不聳奮去地三

四尺車輪陷入土三寸木沴金也劉向曰失衆心令不行言不從以亂金氣也石爲陰臣象也臣將爲變之應武帝暮年君臣唯講經談元朝綱紊亂令不行言不從之咎也其後致侯景之亂 元帝承聖二年正月己卯江夏宮南門籥牡飛

北齊武成河清四年殿上石自起兩兩相擊哇孟以爲石陰類下人象殿上石自起者左右親人離叛之應也及周師東伐寵臣尉相願乞扶貴和兄弟之徒皆叛入周

周武帝建德元年濮陽郡有石像郡官令載向府將刮取金在道自躍投地如此者再乃以大繩縛著車壁又絕繩而下時帝旣滅齊又事淮南征伐不息百姓疲敝失衆心之應也

唐武后長壽中東都天宮寺泥像皆流汗霹靂 中宗神龍中東都白馬寺鐵像頭無故自落於殿門外 元宗天寶五載四月宰臣李適之常列鼎俎具膳羞中夜鼎躍相鬪不解鼎耳及足皆折 穆宗長慶中新都大道觀泥人生鬚數寸拔之復生

後晉出帝開運元年七月一日夜大雷雨明德門內井亭有石槽槽有龍首其夕漂行數步而龍首斷焉識者

云石國姓也而龍首旣斷大不吉之象晉祚果終開運  
宋太祖乾德五年十一月許州開元觀老君像自動時  
知州宋偓以聞 六年正月簡州普通院毗盧佛像自  
動 神宗元豐元年邕州佛像動搖初像嘗動而交人  
入寇又動而州大火其後儂智高叛復動於是知州錢  
師孟投之江中 高宗紹興二年宣州有鐵佛像坐高  
丈餘自動迭前迭却若偃而就人者數日旣而郡有火  
火勝金火氣盛金失其性而爲變怪也 二十年二月  
温州戒福寺有銅佛像頂珠自動光彩激射終日不少  
停數日火作寺焚與宣州鐵佛同占皆火沴金也 孝

宗淳熙九年春德興縣民家有鏡自飛舞與日光相射  
物自壞

卽五行志所謂金沴木也

春秋文公十三年太室屋壞近金沴木木動也先是冬  
僖公薨十六月乃作主後六月又吉禘於太廟而致僖  
公左氏說曰登僖於閔上逆祀也又未三年而吉禘前  
後亂賢父聖祖之大禮太室屋壞象魯自是而陵夷將  
墮周公之祀也

漢景帝三年十二月吳二城門自傾大船自覆劉向以  
爲近金沴木木動也先是吳王濞以太子死於漢稱疾

不朝陰與楚王戊謀爲逆亂城猶國也其一門名曰楚門一門曰魚門吳地以船爲家以魚爲食天戒若曰與楚所謀傾國覆家吳王不寤正月與楚俱起兵身死國亡京房易傳曰上下咸諄厥妖城門壞師古曰諄惑也音布內反宣帝時大司馬霍禹所居第門自壞時禹內不順外不敬見戒不改卒受滅亡之誅哀帝時大司馬董賢第門自壞時賢以私愛居大位賞賜無度驕慢不敬大失臣道見戒不改後賢夫妻自殺家徙合浦

後漢桓帝延熹五年太學門無故自壞裴楷以爲太學

前疑所居

本傳楷書無前疑之言也

其門自壞文德將喪教化廢也

是後天下遂至喪亂桓帝永康元年十月壬戌南宮

平城門內屋自壞金沴木木動也其十二月宮車晏駕

靈帝光和元年南宮平城門內屋武庫屋及外東垣

屋前後頓壞蔡邕對曰平城門正陽之門與宮連郊祀

法駕所由從出門之最尊者也武庫禁兵所藏東垣庫

之外障易傳曰小人在位上下咸悖厥妖城門內崩潛

潭巴曰宮瓦自墮諸侯強陵主此皆小人之顯位亂法

之咎也其後黃巾賊先起東方庫兵大動皇后同父兄

何進爲大將軍同母弟苗爲車騎將軍兄弟並貴盛皆

統兵在京都其後進欲誅廢中官爲中常侍張讓段珪

等所殺兵戰宮中闕下更相誅滅天下兵大起 三年  
二月公府駐駕廡自壞南北三十餘間 中平二年二  
月癸亥廣陽城門外上屋自壞 獻帝初平二年三月  
長安宣平城門外屋無故自壞至三年夏司徒王允使  
中郎將呂布殺太師董卓夷三族 袁山松曰李傕等攻  
破長安城害允等  
興平元年十月長安市門無故自壞至二年春李傕  
郭汜鬪長安中傕迫劫天子移置傕塢盡燒宮室殿宇  
城門官府民舍放兵寇抄公卿以下  
魏文帝黃初七年正月幸許昌城南門無故自崩帝心  
惡之遂不入還洛陽此金沴木木之動也五月宮車晏

駕京房易傳曰上下咸悖厥妖城門壞

晉武帝太康五年五月宣帝廟地陷梁折 八年正月

太廟殿又陷改作廟基及泉其年九月遂更營新廟遠

致名材雜以銅柱至十年四月乃成十一月庚寅梁又

折天戒若曰地陷者分離之象梁折木不曲直也明年

帝崩王室遂亂 惠帝太安二年成都王穎使陸機率

衆向京師擊長沙王又軍始引而牙竿折俄而戰敗機

誅穎奔死 元帝太興二年六月吳郡米廡無故自壞

天戒若曰夫米廡貨糴之屋無故自壞此五穀踴貴所

以無糴賣也是歲遂大饑死者千人焉 明帝太寧元

年周筵自歸王敦既立其宅宇所起五間六梁一時躍出墜地餘桁猶巨柱頭此金沴木也明年五月錢鳳謀亂遂族滅筵而湖熟尋亦爲墟矣 安帝元興元年五月丙子會稽王世子元顯將討桓元建牙竿於揚州南門其東者難立良久乃正近沴妖也而元顯尋爲元所擒 三年五月樂賢堂壞時帝嚚眊無樂賢之心故此堂見沴 義熙九年五月國子聖堂壞天戒若曰聖堂禮樂之本無故壞業祚將墜之象未及十年而禪位焉 陳文帝天嘉六年秋七月儀賢堂無故自壓近金沴木也時帝盛修宮室百姓失業故木失其性 後主禎明

元年六月宮內水殿若有刀鋸斫伐之聲其殿因無故而倒七月朱雀船又無故自沉時後主盛修園囿不虔宗廟水殿者遊宴之所朱雀船者國門之大路無故自壞天戒若曰宮室毀津路絕後竟爲隋所滅宗廟爲墟後齊孝昭帝將誅楊愔乘車向省入東門憶竿無故自折帝甚惡之歲餘而崩 武成河清三年長廣郡廳事梁忽剝若人狀太守惡而削去之明日復然長廣帝本封也木爲變不祥之兆其年帝崩 後主武平七年秋穆后將入晉陽向北宮辭胡太后至宮內門所乘七寶車無故陷入於地牛沒四足是歲齊滅后被虜於長安

後周武帝建德六年青城門無故自崩青者東方色春宮之象也時皇太子無威儀禮節青城門無故自崩者皇太子不勝任之應帝不悟明年太子嗣立果爲無道周室危亡實自此始

隋煬帝大業中齊王暕於東都起第新構寢堂其楸無故而折時上無太子天下皆以暕次當立公卿屬望暕遂驕恣呼術者令相又爲厭勝之事堂楸無故自折木失其性好謀之應也天見變以戒之暕不悟後竟得罪於帝

唐高祖武德元年八月戊戌突厥始畢可汗衙帳無故自壞 中宗卽位金雞竿折雞竿所以肆赦始登大號而雞竿折不祥 神龍中有羣狐入御史大夫李承嘉第其堂無故壞又秉筆而管直裂易之又裂 元宗開元五年正月癸卯太廟四室壞 天寶十四載哥舒翰帥師守潼關前軍啓行牙門旗至坊門觸落槍刃衆以爲不祥 代宗永泰二年三月辛酉中書敕庫壞 德宗貞元四年正月庚戌朔德宗御含元殿受朝賀質明殿階及欄檻三十餘間自壞衛士死者十餘人含元路寢大朝會之所御也正月朔一歲之元王者之事天所以儆者重矣 文宗太和九年鄭注爲鳳翔節度使將

之鎮出開遠門旗竿折 僖宗光啓初揚州府署門屋  
自壞故隋之行臺門也制度甚宏麗云

宋高宗紹興三年八月辛亥尚書省後樓屋無故自壞

文獻通考卷第三百七

文獻通考卷第三百八

鄱陽馬端臨貴與著

物異考十四

人異

按傳曰皇之不極厥罰常陰時則有下人伐上之  
痾昌邑王時霍光將議廢立而夏侯勝援此以諫  
王出遊光與張安世疑謀已泄而驚異其說然則  
所謂下人伐上之痾乃犯上反叛之謂然歷代史  
志只謂之人痾而所載者則形體之妖異或舉動  
言語之狂惑或化爲異物或已死復生殊不及叛

逆之事蓋人痾者妖也叛逆者其應也又下而犯上臣而背君其妖孰甚焉故總謂之人痾云

春秋文公十一年敗狄于鹹師古曰鹹魯地也穀梁公羊傳曰

長狄師古曰防風之後漆姓也國號兄弟三人一者之

魯師古曰僑如也來伐一者之齊師古曰榮如也齊襄公二年伐齊為王子

成父師古曰焚如也宣十五年皆殺之身橫九

晦師古曰晦斷其首而載之肩見於軾師古曰軾車前橫木何以

書記異也劉向以為是時周室衰微三國為大可責者

也天戒若曰不行禮義大為夷狄之行將致危亡其後

三國皆有篡弑之禍師古曰謂魯文公薨襄仲弑惡及視而立宣公齊連稱管至父弑襄

公而立無知晉欒書中近下人伐上之痾也劉歆以為

人變屬黃祥一曰屬羸蟲之孽一曰天地之性人為貴

凡人為變皆屬皇極下人伐上之痾云京房易傳曰君

暴亂疾有道厥妖長狄入國又曰豐其屋下獨苦師古曰豐

其屋易豐卦上六爻辭豐大也長狄生世主虜

史記魏襄王十三年魏有女子化為丈夫京房易傳曰

女子化為丈夫茲謂陰昌賤人為王丈夫化為女子茲

謂陰勝厥咎亡一曰男化為女宮刑濫也如淳曰宮刑之行大濫也

女化男婦政行也

赧王三十一年齊有人當闕而哭者求之不得去則聞

其聲時燕昭王伐齊齊湣王出奔為楚將淖齒所弑

史記秦始皇帝二十六年有大人長五丈足履六尺皆

夷狄服凡十二人見於臨洮師古曰隴西之縣也音吐高反天戒若曰

勿大為夷狄之行將受其禍是歲始皇初并六國反喜

以為瑞銷天下兵器作金人十二以象之遂自賢聖燔

詩書院儒士奢淫暴虐務欲廣地南戍五嶺北築長城

以備胡越師古曰五嶺解在張耳陳餘傳塹山填谷西起臨洮東至遼

東徑數千里故大人見於臨洮明禍亂之起後十四年

而秦亡亡自戍卒陳勝發

秦始皇三十六年鄭客從關東來至華陰望見素車白

馬從華山上下知其非人道住止而待之遂至持璧與

客曰為我遺瀉池君長安西北有瀉池君則池神也江神告之因言今年祖

龍死祖始也龍人君象謂始皇也忽不見客奉璧始皇使御史視之

即二十八年過江所湛璧也默然良久曰山鬼不過知

一歲事也

漢高祖為亭長送徒驪山被酒夜經澤中有大蛇當徑

乃拔劍斬蛇後人來至蛇所有一老嫗夜哭人問之曰

吾子白帝子也化為蛇當道今者赤帝子斬之故哭人

以嫗為不誠欲苦之嫗因忽不見後人告高祖高祖心

獨喜自負諸從者日益畏之 景帝二年九月膠東下

密人年七十餘生角角有毛時膠西濟南齊四王有舉  
兵反謀謀由吳王濞起連楚趙凡七國下密縣居四齊  
之中角兵象上鄉者也老人吳王象也年七十七國象  
也天戒若曰人不當生角猶諸侯不當舉兵以鄉京師  
也禍從老人人生七國俱敗云京房易傳曰豕宰專政厥  
妖人生角 武帝征和元年上居建章宮見一男子帶  
劔入中龍華門疑其異人命收之男子捐劔走逐之弗  
獲上怒斬門候冬十一月發三輔騎士大搜上林閉長  
安城門索十一日乃解巫蠱始起 哀帝建平中豫章  
有男子化爲女子嫁爲人婦生一子長安陳鳳言此陽

變爲陰將亡繼嗣自相生之象一曰嫁爲人婦生一子  
者將復一世乃絕 哀帝建平四年四月山陽方與女

子田無嗇生子 師古曰方與者山陽之縣也女  
子姓田名無嗇方與音房豫 先未生

二月兒唬腹中及生不舉葬之陌上三日人過聞唬聲

母掘收養 平帝元始元年二月朔方廣牧女子趙春

病死 師古曰廣牧朔方  
之縣也姓趙名春 斂棺積六日 師古曰斂音力瞻  
反棺音工喚反

出在棺外自言見夫死父曰年二十七不當死太守譚

以聞京房易傳曰幹父之蠱有子考无咎 韋昭曰蠱事  
也子能正父

之事是爲有子故考不爲咎累  
師古曰易蠱卦初六爻辭也 子三年不改父道思慕

不皇亦重見先人之非 師古曰言久有不善之事當速  
改之若唯思慕而已無所變易

是重顯先人之非也一曰三年之內但思慕不則為私而已不暇見父之非故不改也重音直用反

厥妖人死復生一曰至陰為陽下人為上六月長安女

子有生兒兩頭異頸面相鄉四臂共胸俱前鄉師古曰鄉讀曰

嚮尻上有目長二寸所京房易傳曰睽孤見豕負塗師古

曰易睽卦上九爻辭也睽孤乖刺之意也塗泥也睽音苦攜反厥妖人生兩頭下相攘

善妖亦同人若六畜首目在下茲謂亡上正將變更凡

妖之作以譴失正各象其類二首下不一也足多所任

邪也足少下不勝任或不任下也凡下體生於上不敬

也上體生於下媾瀆也生非其類淫亂也人生而大上

速成也生而能言好虛也羣妖推此類不改乃成凶也

王莽始建國二年甄豐子尋坐偽作符命誅黨與死

者數百人尋手理有天子字莽解其臂入視之曰此

一大子也或一六子也六者戮也明尋父子當戮死

也 是歲池陽縣有小人景長尺餘或乘車馬或步

行操持萬物大小多相稱車馬及物皆稱人之形三日止 天

鳳四年連率韓博上言有奇士長丈大十圍來至臣

府曰欲奮擊胡虜謂巨毋霸出於蓬萊東南五城西

北昭如海瀕昭如海名也輶車不能載三馬不能勝即日

以大車四馬建虎旗載霸詣闕霸卧則枕鼓以鐵著

食乞迎之於道京師門戶不容者開高大之以視百

後漢靈帝建寧三年春河內婦食夫河南夫食婦

臣昭曰以

夫之尊在河之陽而陰承體卑吞食尊陽將非君道昏弱無居剛之德遂為陰細之人所能消毀乎夫為家之主而乃自食正內之人時宋皇后將立而靈帝一聽閹官無所厝心宋后終廢天戒若曰徒隨嬖豎之意夫噉其妻

二年雒陽上西門外女子生兒兩頭異肩共胷

俱前向以為不祥墮地棄之自此之後朝廷霧亂政在

私門上下無別二頭之象後董卓弑太后被以不孝之

名放廢天子後復害之漢元以來禍莫踰此 四年魏

郡男子張博送鐵盧詣太官博上書室殿山居屋後宮

禁落屋謹呼上收縛考問辭忽不自覺知

臣昭曰魏人入宮既奪漢

之徵至後宮而謹呼終亦禍廢母后

中平元年六月壬申雒陽男子劉

倉居上西門外妻生男兩頭共身

靈帝時江夏黃氏

之母浴而化為鼃入於深淵其後時出見初浴簪一銀

釵及見猶在其首

臣昭曰黃者代漢之色女人臣妾之體化為鼃鼃者元也入於深淵水實

制火夫君德尊陽利見九五飛在於天乃備光盛俯等龜鼃有愧潛躍首從戴釵卑弱未盡

獻帝

初平中長沙有人姓桓氏死棺斂月餘其母聞棺中聲

發之遂生占曰至陰為陽下人為上其後曹公由庶士

起 建安四年二月武陵充縣女子李娥年六十餘物

故其家以杉木樁斂墓於城外數里上已十四日有行

者聞冢中有聲便語其家其家往視聞聲便發出遂活

七年越雋有男子化爲女子時周羣上言哀帝時亦有此異將有易代之事至二十五年獻帝封於山陽建安中女子生男兩頭共身

魏文帝黃初初清河宋士宗母化爲鱉入水 明帝太和三年曹休部曲邱奚農女死復生時有開周世冢得殉葬女子數日而有氣數月而能言郭太后愛養之又太原人發冢破棺棺中有一生婦人問其本事不知也視其墓木可三十歲按京房易傳曰至陰爲陽下人爲上宣帝起之象也漢平帝獻帝並有此異占以爲王莽曹操之證 青龍元年并州刺史畢軌送漢故渡遼將

軍范明友鮮卑奴年三百五十歲而言品飲食如常人奴云霍顯光後小妻明友妻光前妻女時京邑有一人失其姓名食啖兼十許人遂肥不能動其父曾作遠方長吏官徒送彼縣令故義傳供食之一二年中一鄉輒爲之儉 三年中壽春農民妻自言爲天神所下命爲登女當營衛帝室蠲邪納福飲人以水及以洗創或多愈者於是立館後宮下詔稱揚甚見優寵及景初二年帝疾飲水無驗以致大漸於是斬焉 元帝咸寧二年八月襄武縣言有大人見長三丈餘跡長三尺二寸髮白著黃巾單衣拄杖呼王始語曰今當太平晉尋代魏

吳孫休時烏程人有得困病及瘥能以嚮言者言於此而聞於彼自其所聽之不覺其聲之大也自遠聽之如人對言不覺聲之自遠來也聲之所往隨其所向遠者所過十數里其鄰人有責息於外歷年不還乃假之使爲責讓懼以禍福負物者以爲鬼神卽顛倒昇之其人亦自不知所以然也

按此事晉史置之言不從條下然此妖異也故今移置之人痾門云

孫休永安四年安吳氏陳焦死七日復生穿冢出干寶曰此與漢宣帝同事烏程侯皓承廢故之家得位之祥

也 孫皓寶鼎元年丹陽宣騫母時年八十因浴化爲黿兄弟閉戶衛之掘堂上作一大坎實水其中黿入坎遊戲一二日恒延頸外望伺戶小開便輪轉自躍入於遠潭遂不復還此與漢靈帝時黃氏母事同吳亡之象也

晉武帝泰始五年元城人年七十生角殆趙王倫篡亂之象也 咸寧二年十二月琅邪人顏畿病死棺斂已久家人咸夢畿謂已曰我當復生可急開棺遂出之漸能飲食屈伸視瞻不能行語二年復死京房易傳曰至陰爲陽下人爲上厥妖人死復生其後劉石僭逆遂亡

晉室下爲上之應也 惠帝元康中安豐有女子周世  
寧八歲漸化爲男子至十七八而氣性成京房易傳曰  
女子化爲丈夫茲謂陰昌賤人爲王此亦劉石覆蕩天  
下之妖也 元康中梁國女子許嫁已受禮聘尋而其  
夫戍長安經年不歸女家更以適人女不樂行其父母  
逼強不得而去尋病亡後其夫還問其女所在其家具  
說之其夫逕至女墓不勝哀情便發冢開棺女遂活因  
與歸家後壻聞知詣官爭之所在不能決祕書郎王導  
議曰此是非常事不得以常理斷之宜還前夫朝廷從  
其議 惠帝世杜錫家葬而婢誤不得出後十年開冢

耐葬而婢尙生始如瞶有頃漸覺問之自謂再宿爾初  
婢之埋年十五六及開冢更生猶十五六也嫁之有子

光熙元年會稽謝真生子頭大而有髮兩蹠之石反

向上有男女兩體生便作丈夫聲經一日死此皇之不  
極下人伐上之病於是諸王有僭亂之象也 惠帝之

世京洛有人兼男女體亦能兩用人道而性尤淫此亂  
氣所生自咸寧太康之後男寵大興甚於女色士大夫  
莫不尙之天下相倣倣或至夫婦離絕多生怨曠故男  
女氣亂而妖形之作也 懷帝永嘉元年吳郡吳縣萬  
祥婢生子鳥頭兩足馬蹄一手無毛尾黃色大如枕此

亦人妖亂之象也 五年五月枹罕令嚴根妓產一龍  
一女一鷺京房易傳曰人生他物非人所見者皆爲天  
下大兵是時帝承惠皇之後四海沸騰尋而陷於平陽  
爲逆胡所害此其徵也 愍帝建興四年新蔡縣吏任  
僑妻產二女腹與心相合自胷以上臍以下各分此蓋  
天下未一之妖也時內史呂會上言按瑞應圖異根同  
體謂之連理異畝同穎謂之嘉禾草木之異猶以爲瑞  
今二人同心易稱二人同心其利斷金蓋四海同心之  
瑞也時皆哂之俄而四海分崩帝亦淪沒 元帝太興  
初有女子其陰在腹當<sub>前</sub>下自中國來至江東其性淫

而不產又有女子陰在首渡在揚州性亦淫京房易傳

曰人生子陰在首天下大亂在腹天下有事在背天下

無後於時王敦據上流將欲爲亂是其徵 三年十二

月尚書駱謝平妻生女墮地鼻鼻<sub>匹備</sub>有聲須臾便死

鼻目皆在頂上面處如項口有齒都連爲一胷如鼈手

足爪如鳥爪皆下勾此亦人生他物非人所見者後二

年有石頭之敗 明帝太寧二年七月丹陽江寧侯紀

妻死經三日復生 成帝咸康五年四月下邳民王和

僑居暨<sub>居未</sub>反 陽息女可年二十自云上天來還得徵瑞

印綬當母天下晉陵太守以爲妖收付獄至十一月有

人持柩

之夜反

杖絳衣詣止車門口列爲聖人使求見天

子門候受辭辭稱姓呂名賜其言王和女可右足下有

七星星皆有毛長七寸天今命可爲天下母奏聞卽伏

誅并下晉陵誅可 康帝建元二年十月衛將軍營督

過望所領兵陳瀆女臺有文在其足曰天下之母灸之

愈明京都誼譁有司收繫以聞俄自建康縣獄亡去明

年帝崩獻后臨朝此其祥也 孝武帝寧康初南郡州

陵女唐氏漸化爲丈夫 安帝義熙七年無錫人趙未

年八歲一旦暴長八尺髭鬚

上卽移反下相俞反

蔚然三日而

死 義熙中東陽人莫氏生女不養埋之數日於土中

啼取養遂活 義熙末豫章吳平人有二陽道重累生

恭帝元熙元年建安人陽道無頭正平本下作女人

形體

劉聰子約死一指猶暖遂不殯殮及蘇言見元海於

不周山經五日而遂復從至崑崙山三日而復返於

不周見諸王公卿將相死者悉在宮室甚壯麗號曰

蒙珠離國元海謂約曰東北有遮須夷國無主久待

汝父爲之汝父後三年當來來後國中大亂相殺害

居家死亡略盡但可永明輩十數人在耳汝宜還後

年當來見汝不久約拜辭而回道過一國曰猗尼渠

餘國引約入宮與約皮囊一枚曰爲吾遺漢皇帝約辭而歸謂約曰劉郎後年來必見過當以小女妻之約歸置皮囊於机上俄而蘇使左右机上取皮囊開視之有一方白玉題文曰猗尼渠餘國天王敬信遮須夷國天王歲在攝提當相見也馳使呈聰聰曰若審如此吾不懼死也及聰死與此玉并葬焉 苻健時新平有長人見語百姓張靖口苻氏應天受命今當太平外面者歸中而安泰問姓名弗答俄而不見新平令以聞健以爲妖下靖獄會大雨霖河渭溢浦津監寇登得一屐於河長七尺三寸人跡稱之指長尺餘文深一寸健歎曰覆載之中何所不有張靖所見定不虛也乃赦之

宋明帝泰豫元年正月丁巳巨人跡見西池冰上

梁武帝時海中浮鵠山去餘姚岸可千餘里有女人年三百歲有女官道士四五百人年並出百但在山學道遣使獻紅席帝方捨身時其使適至云此草常有紅鳥居下故以爲名觀其圖狀則鸞鳥也時又有男子不知何許人於大衆中自割身以飼饑鳥血流徧體而顏色不變又沙門智泉鐵鉤挂體以燃千燈一日一夜端坐不動 太清元年丹陽有莫氏妻生男眼在頂上大

如兩歲兒墮地而言曰兒是旱疫鬼不得住母曰汝當  
令我得過疫鬼曰有上官何得自由母可急作絳帽故  
當無憂母不暇作帽以絳繫髮自是旱疫者二年揚徐  
兗豫尤甚莫氏鄉鄰多以絳免他土效之無驗 簡文  
大寶二年京口人於藏兒年五歲登城西南角大樓打  
鼓作長搗鼓兵象也時侯景亂江南 元帝承聖元年  
十二月天門山獲野人出山三日而死

陳武帝永定三年有人長三丈見羅浮山通身潔白衣  
服楚麗京房易傳曰長人見亡後二歲帝崩 後主爲  
太子時有婦人突入東宮而大言曰畢國主後主立而

祚終之應也 至德三年八月建康人家婢死埋之九  
日而更生有牧牛人聞而出之 禎明二年有神自稱  
老子游於都下與人對語而不見形言吉凶多驗得酒  
輒釀之經三四年乃去有船下忽聞人言曰明年亂視  
之得死嬰兒長三尺而無頭明年陳亡

後魏太武大延元年有鄙婦人持方寸玉印詣潞縣侯  
孫家旣而亡去莫知所在印有三字爲龍鳥之形要妙  
奇巧不類人跡文曰旱疫平

後齊文宣天保中臨漳有婦人產子二頭共體是後政  
由奸佞上下無別兩頭之應也 武成河清四年有神

見於後園萬壽堂前山穴中其體壯大不辨其面兩齒  
絕白長出於唇帝直宿嬪御已下七百人咸見焉帝又  
夢之 後主武平五年大旱晉陽得死魃長二尺面頂  
各二目帝聞之使刻木爲其形以獻

後周武帝保定三年有人產子男陰在背上如尾兩足  
指如獸爪陰不當生於背而生者陰陽反覆君臣顛倒  
之象也人足不當有爪而有者將致攫人之變也時晉  
公護專政征伐自己陰懷篡逆帝誅之 武帝時有強  
練者佯狂持一瓢至晉蕩公護門而擊破之曰身尚可  
子苦矣時護專政因朝太后帝擊殺之發兵捕其諸子  
城爲墟矣

隋高祖開皇六年霍州有老翁化爲猛獸 七年相州  
有桑門變爲蛇尾繞樹而白抽長二丈許 仁壽四年  
有人長數丈見於應門其跡長四尺五寸其年帝崩  
煬帝大業元年鴈門人房回安母年百歲額上生角長  
二寸洪範五行傳曰婦人陰象也角兵象也下反上之  
應是後天下果大亂陰戎圍帝於鴈門 四年鴈門宋  
谷村有婦人生一肉卵大如斗埋之後數日所埋處雲

霧盡合從地雷震而上視之洞穴失卯所在 六年趙郡李來王家有婢產一物大如卵 七年正月朔旦有盜衣白練裙襦手持香花自稱彌勒佛出世入建國門奪衛士仗將爲亂齊王暕遇而斬之後三年楊元感作亂引兵圍洛陽戰敗乃伏誅 八年有澄公者若狂人於東都大叫唱賊帝聞而惡之明年元感作亂舉兵圍洛陽至十二年澄公又大叫賊李密逼東都孟讓燒豐東都市而去 九年帝在高陽唐縣人宋子賢善爲幻術每夜樓上有光明能變作佛形自稱彌勒出世又懸大鏡於堂上紙素上畫爲虵爲獸及人形有人來禮謁

者轉側其鏡遣觀來生形像或映見紙上地形子賢輒告云此罪業也當更禮念又令禮謁乃轉人形京之遠近惑信日數百千人遂潛謀作亂將爲無遮佛會因舉兵欲襲擊乘輿事泄鷹揚郎將以兵捕之夜至其所遶其所居但見火坑兵不敢進郎將曰此地素無坑止妖妄耳及進無復火矣遂擒斬之并坐其黨與千餘家其後復有桑門向海明於扶風自稱彌勒佛出世潛謀逆亂人有歸心者輒獲吉夢由是人皆惑之三輔之士翕然稱爲大聖因舉兵反衆至數萬官軍擊破之京房易飛候曰妖言動衆者茲謂不信路無人行不出三年起

兵自是天下大亂路無人行

唐高祖武德四年太原尼志覺死十日而蘇 太宗貞

觀十九年衛州人劉道安頭生肉角隱見不常因以惑  
衆伏誅角兵象肉不可以觸者 高宗永徽六年淄州

高苑民吳威妻嘉州民辛道護妻皆一產四男凡物反  
常則爲妖亦陰氣盛則母道壯也 顯慶三年普州有

人化爲虎虎猛噬而不仁 儀鳳三年四月涇州獻二

小兒連心異體初鶉觚縣衛士胡萬年妻吳生一男一  
女其胸相連餘各異體乃析之則皆死又產復然俱男  
也遂育之至是四歲以獻於朝 永隆元年長安獲女

魃長尺有二寸其狀怪異詩曰旱魃爲虐如惔如焚是

歲秋不雨至於明年正月 二年九月萬年縣女子劉

凝靜衣白衣從者數人升太史令廳問比有何災異令

執之以聞是夜彗星見太史司天文歷候王者所以奉

若天道恭授民時者非女子所當問 武后載初中涪

州民范端化爲虎 神功元年二月庚子有人走入端

門又入則天門至通天宫闈及仗衛不之覺時來俊臣

婢產肉塊如二升器剖之有赤蟲須臾化爲蜂螫人而

去 久視二年正月成州有大人跡見長安中郴州左

史因病化爲虎欲食其嫂擒之乃人也雖未全化而虎

毛生矣 睿宗太極元年狂人段萬謙潛入承天門登  
太極殿升御牀自稱天子且言我李安國也人相我年  
三十二當爲天子 元宗開元二十三年四月冀州獻  
長人李家寵八尺有五寸 代宗大歷十年二月昭應  
婦人張產一男二女 德宗貞元八年正月丁亥許州  
人李狗兒持杖上含元殿擊欄檻伏誅 十年四月恒  
州有巨人跡見 十五年正月戊申狂人劉忠詣銀臺  
稱白起令上表天下有火災 十七年十一月翰林待  
詔戴少平死十有六日而蘇是歲宣州南陵縣丞李嶷  
死已殯三十日而蘇 憲宗元和二年商州洪崖治役

夫將化爲虎衆以水沃之不果化 穆宗長慶四年三  
月民徐忠信潛入浴堂門 敬宗寶歷二年十二月延  
州人賀文妻一產四男 文宗太和二年十月狂人劉  
德廣入含元殿 懿宗咸通七年渭州有人生角寸許  
占曰天下有兵 十三年四月太原晉陽民家有嬰兒  
兩頭異頸四手聯足此天下不一之妖是歲民皇甫及  
年十四暴長七尺餘長啜大嚼三倍如初歲餘死 僖  
宗乾符六年秋蜀郡婦人尹生子首如豕目在睢下占  
曰君失道 光啓元年隰州溫泉民家有死者旣葬且  
半月行人聞聲呼地下其家發之則復生歲餘乃死

二年春鳳翔郿縣女子未亂化爲丈夫旬日而死京房  
易傳曰茲謂陰昌賊人爲王 昭宗大順元年六月資  
州兵王全義妻如孕覺物漸下入股至足大拇痛甚拆  
而生珠如彈丸漸長大如杯 天祐二年五月潁州汝  
陰民彭文妻一產三男

蜀工建元年巨人見青城山

南漢劉鋹時南海民妻生子兩首四臂

宋自太祖建隆元年至真宗天禧四年郡縣上言民妻  
產二男者凡一百九產四男者凡三產一男三女者二  
產二男一女者一 太祖建隆三年齊州晉州大旱民

家多生魃 太宗太平興國九年揚州揚子縣民妻生  
男毛被體半寸餘面長頂高鳶肩眉毫麤密近髮際有  
毛兩道軟長眼微紫唇紅厚耳鼻大類胡僧至三歲畫  
圖以獻 淳化元年八月汾州悉達院僧智嚴頭生角  
可長三寸 真宗天禧四年七月衡州耒陽縣民張中  
妻產三男其一額有白痣方寸餘上生白髮 仁宗天  
聖至英宗治平婦人生四男者二生三男者四十四生  
二男一女者一說者曰天下安寧人民蕃息之驗也  
神宗熙寧元年距元豐七年郡邑民家生三男者八十  
四而四男者一二男一女者一 元豐八年至哲宗元

符二年生三男者十八而四男者二三男一女者一  
元符三年至欽宗靖康生三男者十九四男者一 徽  
宗宣和六年都城有賣青果男子孕而誕子蓐母不能  
收易七人始免而逃去又有酒肆號豐樂樓酒保朱氏  
子之妻可四十餘楚州人忽生髭長僅六七寸疏秀而  
美宛然一男子特詔度爲女道士 高宗紹興三年建  
康府桐林灣人產兒肉角有齒角兵象肉不可以觸者  
是歲人多產鱗毛皆人痾也 二十年八月洋州真符  
縣民家一產三男 孝宗隆興元年建康民流寓行都  
產子二首具羽毛之形 乾道五年衡湘間有人化爲

虎者與唐志顯慶二年人痾同占餘杭縣民婦產子青

而毛二肉角又有二家婦產子毛角亦如之皆連體兩

面相鄉鄉與鄉同三家纔相去一二里痾氣同所鍾也又潮

州城西婦孕過期產兒如指大五體皆具者百餘蠕蠕

能動人痾之異也 淳熙十年鄱陽南鄉民產子兩肘

各有二臂長十五歲每鬪則六臂並運 十三年行都

有人死十四日復生十一月辛未鄧家巷民婦產肉塊

三其一直目而橫口 十四年六月臨安府浦頭民產

子生而能言四日暴長四尺 光宗紹熙元年平江府

崑山縣石工採石而山摧工壓焉三年六月他工採石

鄰山聞其聲呼相應答如平生報其家鑿石出之見其妻喜曰久閉乍風肌如裂俄頃聲微噤不語化爲石人貌如生 寧宗慶元元年饒州樂平民產子人體有尾永州民產兒首有角腋有肉翅 二年七月隆興府進賢縣民產子亦如之而面有三目 嘉定元年四月鎮江後軍妻生子一身二首四臂晉志謂中原分裂應此人痾也後數年金人失中原

文獻通考卷第三百八

鄱陽馬端臨貴與著

物異考十五

詩異

文獻通考卷第三百九

春秋左氏傳晉獻公時童謠曰丙之晨龍尾伏辰衿服

振振取虢之旂

師古曰徒歌曰謠衿服黑衣振振初服之貌也衿音均又音弋春反振只人反

鶉之賁賁天策焯焯火中成軍虢公其犇

師古曰犇者奔焯音吐敦

反又音敦犇古奔字

是時虢爲小國介夏陽之阨怙虞國之助

師古

曰介亢衡於晉有炕陽之節失臣下之心晉獻伐之問

於卜偃曰吾其濟乎

師古曰卜偃晉大夫主卜者

偃以童謠對曰克

之十月朔丙子旦日在尾月在策鶉火中必此時也冬  
 十二月丙子朔晉師滅虢虢公醜犇周周十二月夏十  
 月也言天者以夏正 史記晉惠公時童謠曰恭太子  
 更葬兮後十四年晉亦不昌昌廼在其兄是時惠公賴  
 秦力而立立而背秦內殺二大夫師古曰謂里克丕鄭國人不說  
師古曰說讀曰悅及更葬其兄恭太子申生而不敬故詩妖作  
 也後與秦戰為秦所獲立十四年而死晉人絕之更立  
 其兄重耳是為文公遂伯諸侯師古曰伯讀曰霸左氏傳文  
 成之世童謠曰鸚之鵠之公出辱之師古曰鸚音劬鵠音欲鸚鵠  
 之羽公在外野往饋之馬師古曰饋亦餽字鸚鵠跣跣公在乾

侯臣瓚曰乾侯在魏郡斥邱縣師古曰跣音乾音干徵褰與襦師古曰徵求也  
 褰袴也言公出外求袴襦之服 鸚鵠之巢遠哉搖搖師古曰搖搖不安之貌 綢父  
 喪勞宋父以驕師古曰父讀曰甫甫者男子之通號故云綢甫宋甫也言昭公欲去季氏不遂  
 而出故曰喪勞定公無德 鸚鵠鸚鵠往歌來哭師古曰謂昭公  
 於下坐致君位故曰以驕 乃以喪歸之 至昭公時有鸚鵠來巢公攻季氏敗出奔  
 齊居外野次乾侯八年死于外歸葬魯昭公名綢公子  
 宋立是為定公

漢元帝時童謠曰井水溢滅竈煙灌玉堂流金門至成  
 帝建始二年三月戊子北宮中井泉稍上溢出南流象  
 春秋時先有鸚鵠之謠而後有來巢之驗井水陰也竈  
 乾隆十二年校刊

煙陽也玉堂金門至尊之居象陰盛而滅陽竊有宮室

之應也王莽生於元帝初元四年至成帝封侯為三公

輔政因以篡位 成帝時童謠曰燕燕尾涎涎師古曰

澤貌音徒見反張公子時相見木門倉琅根燕飛來啄皇孫皇

孫死燕啄矢其後帝為微行出遊常與富平侯張放俱

稱富平侯家人過河陽主作樂見舞者趙飛燕而幸之

故曰燕燕尾涎涎美好貌也張公子謂富平侯也木門

倉琅根謂宮銅鍤師古曰門之鋪首及銅鍤也銅色青故曰倉琅鋪首銜環故謂之根鍤讀

與環同言將尊貴也後遂立為皇后弟昭儀賊害後宮皇

子卒皆伏辜所謂燕飛來啄皇孫皇孫死燕啄矢者也

成帝時歌謠又曰邪徑敗良田讒口亂善人桂樹華

不實黃爵巢其顛古為人所羨今為人所憐桂赤色漢

家象華不實無繼嗣也王莽自謂黃象黃爵巢其顛也

王莽末天水童謠日出吳門望緹羣見一蹇人言欲

上天今天可上地上安得民時隗囂初起兵於天水

後意稍廣欲為天子遂破滅囂少病蹇吳門冀郭門

名也緹羣山名也

後漢更始時南陽有童謠曰諧不諧在赤眉得不得在

河北是時更始在長安世祖為大司馬平定河北後更

始為赤眉所殺世祖自河北興 世祖建武元年帝先

在長安時同舍生彊華自關中奉赤伏符曰劉秀發兵

捕不道四夷雲集龍鬪野四七之際火爲主

四七二八年自高

祖至光武初起合二百二十八年即四七之際也漢火德故火爲主也

羣臣奏以爲受命

之符光武乃命有司設壇場以六月己未卽皇帝位於

鄗改鄗爲高邑 建武六年蜀有童謠曰黃牛白腹五

銖當復是時公孫述僭號於蜀時人竊言王莽稱黃述

欲繼之故稱白五銖漢家貨明當復也述遂誅滅 順

帝之末京都童謠曰直如弦死道邊曲如鈎反封侯按

順帝卽世孝質短祚大將軍梁冀貪樹疏幼久專國柄

太尉李固以清河王年長有德欲立之冀白太后策免

固而立桓帝固是月幽斃於獄暴尸道路而胡廣趙戒

袁湯俱封侯云 桓帝初天下童謠曰小麥青青大麥

枯誰當穫者婦與姑丈夫何在西擊胡吏買馬君具車

請爲諸君鼓隴胡按元嘉中涼州諸羌俱反大爲民害

命將出衆每戰常負中國益發甲卒麥多委棄但有婦

女收穫吏買馬君具車者言調發重及有秩者也請爲

諸君鼓隴胡者不敢公言私咽語 桓帝之初京都童

謠曰城上烏尾畢逋父爲吏子爲徒一徒死百乘車車

班班入河間河間姪女工數錢以錢爲室金爲堂石上

慊慊春黃梁梁下有懸鼓我欲擊之丞卿怒按此皆謂

爲政貪也城上烏尾畢逋者處高利獨食不與下共謂  
人主多聚斂也父爲吏子爲徒者言蠻夷將畔逆父旣  
爲軍吏其子又爲卒徒往擊之也一徒死百乘車者言  
前一人往討胡旣死矣後又遣百乘車往臣昭曰志家此釋豈未盡  
乎往徒一死何用百乘其後驗意爲靈帝作此言一徒  
似斥桓帝帝貴任羣閹參委機政左右前後莫非刑人  
有同囚徒之長故言寄一徒也且又弟則廢黜身無嗣  
魁然單獨非一而何百乘車者乃國之君解犢後徵王  
膺斯數繼以班車班班入河間者言上將崩乘輿班班  
班尤得以類焉應劭釋此句云徵靈帝者輪班擁節入河間也河間姪女工  
入河間迎靈帝也  
數錢一本作妖女以錢爲室金爲堂者靈帝旣立其母永樂  
太后好聚金以爲堂也石上慊慊春黃梁者言永樂雖

積金錢慊慊常苦不足使人舂黃梁而食之梁下有懸  
鼓我欲擊之丞卿怒者言永樂主教靈帝使賣官受錢  
所祿非其人天下忠篤之士怨望欲擊懸鼓以求見丞  
卿主鼓者亦復諂順怒而止我也 桓帝之初京都童  
謠曰游平賣印自有平不辟豪賢及大姓按到延熹之  
末鄧皇后以譴自殺乃以竇貴人代之其父名武字游  
平拜城門校尉及太后攝政爲大將軍與太傅陳蕃合  
心戮力惟德是建印綬所加咸得其人豪賢大姓皆絕  
望矣 桓帝之末京都童謠曰茅田一頃中有井四方  
纖纖不可整嚼復嚼今年尚可後年饒風俗通作饒按易曰

拔茅茹以其彙征吉茅喻羣賢也井者法也時中常侍  
管霸等專作威福禁錮黨人茅田一項者言羣賢衆多  
也中有井者言雖阨窮不失法度也四方纖纖不可整  
者言姦慝大熾不可整理嚼復嚼者京都飲酒相強之  
辭言肉食者鄙不恤王政徒耽宴飲歌呼而已也今年  
尚可言但禁錮後年饒者陳寶被誅天下大壞 桓帝  
之末京都童謠曰白蓋小車何延延河間來合諧河間  
來合諧按解犢亭屬饒陽河間縣居無幾桓帝崩使者  
與解犢侯皆白蓋車從河間來延延衆貌也 靈帝之  
末京都童謠曰侯非侯王非王千乘萬騎上北芒按到

中平六年史侯登躡至尊獻帝未有爵號爲中常侍段  
珪等數十人所執公卿百官皆隨其後到河上乃得來

還此爲非侯非王上北芒者也

英雄記曰京都謠歌咸言河臘叢進獻帝臘月

生也風俗通曰烏臘烏臘按逆民董卓滔天虐民窮凶極惡關東舉兵欲共誅之轉相顧望莫肯先進處處停

兵數十萬若烏臘 靈帝中平中京都歌曰承樂世董

逃遊四郭董逃蒙天恩董逃帶金紫董逃行謝恩董逃

整車騎董逃垂欲發董逃與中辭董逃出西門董逃瞻

宮殿董逃望京城董逃日夜絕董逃心摧傷董逃

曰卓改 按董謂董卓也言雖跋扈縱其殘暴終歸逃竄

爲董安 絕之死者千數靈帝之末禮樂崩壞賞刑

失中毀譽無驗競飾偽服以盪典制遠近翕然咸名後  
生放聲者為時人有識者竊言舊曰世人次曰俗人今  
更曰時人此天促其期也 獻帝踐祚之初京都童謠  
其間無幾天下大壞也

曰千里草何青青十日卜不得生按千里草為董十日  
卜為卓凡別字之體皆從上起左右離合無有從下發  
端者也今二字如此者天意若曰卓自下摩上以臣陵

君也青青者暴盛之貌也不得生者亦旋破亡 獻帝初

燕南垂趙北際中央不台大如礪唯有此中可避世公  
孫瓚以為易地當之遂徙鎮焉乃修城積穀以待天下  
之變建安二年袁紹攻瓚大敗縊其姊妹妻子引火自  
焚紹兵趣登臺斬之初瓚破黃巾殺劉虞乘勝南下侵  
據齊地雄威大振而不能開廓遠圖欲以堅 建安初  
城觀時坐聽圍戮斯亦自易地而去世也

荆州童謠曰八九年間始欲衰至十三年無子遺言自

中興以來荆州無破亂及劉表為牧又豐樂至此逮八  
九年當始衰者謂劉表妻當死諸將並零落也十三年

無子遺言十三年表又當死民當移詣冀州也 干寶搜

是時華容有女子忽啼呼云有大喪言語過差縣以為  
妖言繫獄百餘日忽於獄中哭曰劉荆州今日死華容  
去州數日即遣馬吏驗視表果死縣乃出之續又歌吟  
曰不意李立為貴人後無幾曹公平荆州以涿郡李立  
字建賢為 荆州刺史

魏明帝太和中京師歌堯鈴曹子其唱曰其奈汝曹何  
此詩妖也其後曹爽見誅曹氏遂衰 景初初童謠曰

阿公阿公駕馬車不意阿公東渡河阿公來還當奈何  
及宣帝遼東歸至白屋當還鎮長安會帝疾篤急召之

乃乘追鋒車東渡河終如童謠之言 齊王嘉平中有謠曰白馬素羈西南馳其誰乘者朱虎騎朱虎者楚王小字也王凌令狐愚聞此謠謀立彪事發凌等伏誅彪賜死

吳孫亮初童謠曰吁汝恪何若若蘆葦單衣篋鉤絡於何相求常子閣常子閣者反語石子岡也鉤絡鉤帶也及諸葛恪死果以葦席裹身篋束其腰投石子岡後聽恪故吏收斂求之此岡云 孫亮初公安有白鼉徒何反鳴童謠曰白鼉鳴龜背平南郡城中可長生守死不去義無成南郡城可長生者有急易以逃也明年諸葛恪

敗弟融鎮公安亦見襲融刮古剎反金印龜服之而死鼉

有鱗介甲兵之象又白祥也 孫休永安二年將守質

子羣聚嬉戲有異小兒忽來言曰三公鋤司馬如又曰

我非人熒惑星也言畢上昇仰視若曳一疋練有頃沒

干寶曰後四年而蜀亡六年而魏廢二十一年而吳平

於是九服歸晉魏與吳蜀並戰國三公鋤司馬如之謂

也 孫皓遣使者祭石印山下妖祠使者因以丹書巖

曰楚九州渚吳九州都揚州土作天子四世治太平矣

皓聞之意益張曰從太皇帝至朕四世太平之主非朕

復誰恣虐踰甚尋以降亡近詩妖也 孫皓天紀中童

謠曰阿童復阿童銜刀遊渡江不畏岸上獸但畏水中  
龍武帝聞之加王濬龍驤將軍及征吳江西衆軍無過  
者而王濬先定秣陵

晉武帝太康元年平吳後江南童謠曰局縮肉數橫目  
中國當敗吳當復又曰宮門柱且莫朽吳當復在三十  
年後又曰雞鳴不拊音撫翼吳復不用力於時吳人皆謂

在孫氏子孫故竊發爲亂者相繼按橫目者四字自吳  
亡至元帝興幾四十年元帝興於江東皆如童謠之言  
焉元帝懦乃亂反本作儒而少斷局縮肉者有所斥也 太康

末京洛爲折楊柳之歌其曲始有兵革苦辛之辭終以

擒獲斬截之事是時三楊貴盛而被族滅太后廢黜幽  
死中宮折楊柳之應也 惠帝永熙中河內溫縣有人

如狂造書曰光光文長大戟爲墻毒藥雖行戟還自傷  
又曰兩火沒地哀哉秋蘭歸形街郵終爲人歎及楊駿

居內府以戟爲衛死時又爲戟所害傷楊后被廢賈后  
絕其膳八日而崩葬街郵亭北百姓哀之也兩火武帝  
諱蘭楊后字也其時又有童謠曰二月末三月初荆筆

楊板行詔書宮中大馬幾作驢此時楊駿專權楚王用  
事故言荆筆楊板二人不誅則君臣禮悖故云幾作驢

元康中京洛童謠曰南風起吹白沙遙望魯國何嗟

昨何峨五歌反千歲髑髏獨婁二音反生齒牙又曰城東馬子莫

隴盧紅反响凶音比至來年纏汝髮南風賈后字也白晉行

也沙門太子小名也魯賈謚國也言賈后將與謚為亂

以危太子而趙王因釁咀慈呂反嚼在爵反豪賢以成篡奪

不得其死之應也元康中天下商農通著大鄣諸良反

日時童謠曰屠塗音蘇鄣日覆兩耳當見瞎許轄反兒作天

子及趙王倫篡位其目實眇焉趙王倫既篡洛中童謠

曰獸從北來鼻頭汗龍從南來登城看水從西來河灌

灌數月而齊王成都河間義兵同會誅倫按成都西藩

而在鄴故曰獸從北來齊東藩而在許故曰龍從南來

河間水源而在關中故曰水從西來齊留輔政居於宮

西又有無君心故言登城看也秦安中童謠曰五馬

遊渡江一馬化為龍後中原大亂宗藩多絕唯琅邪汝

南西陽南頓彭城同至江東而元帝嗣統矣司馬越還

洛有童謠曰洛中大鼠長尺二若不早去大狗至及苟

晞將破汲桑又謠曰元超兄弟大落度上桑打樵為苟

作由是越惡晞奪其兗州隙難遂構焉愍帝初有童

謠曰天子何在豆田中至建興四年帝降劉曜在城東

豆田壁中建興中江南謠歌曰訇呼宏反如白坑破合

集持作鯁武音揚州破換敗吳興覆馘音甄反盧斗按白者

乾隆十二年校刊

物異十五

晉行坑器有口屬瓮瓦瓮質剛亦金之類也訇如白坑破者言二都傾覆王室大壞也合集持作甌者元帝鳩集遺餘以主社稷未能克復中原但偏王江南故其諭也及石頭之事六軍大潰兵人抄掠京邑爰及二宮其後三年錢鳳復攻京邑阻水而守相持月餘日焚燒城邑井堙音因木刊矣鳳等敗退沈充將其黨還吳興官軍踵之蹈藉郡縣充父子授首黨與誅者以百數所謂揚州破換敗吳興覆甌甌甌瓦器又小於甌也 明帝太寧初童謠曰惻惻力力放馬山側大馬死小馬餓高山崩石自破及明帝崩成帝幼爲蘇峻所逼遷於石頭

御膳不足此大馬死小馬餓也高山峻也又言峻尋死石峻弟蘇石也峻死後石據石頭尋爲諸公所破復是崩山石破之應也 成帝之末又有童謠曰噉噉苦盍反何隆隆駕車入梓宮少日而宮車晏駕 咸康二年十二月河北謠云麥入土殺石武後如謠言

庾亮初鎮武昌出至石頭百姓於岸上歌曰庾公上武昌翩翩如飛鳥庾公還揚州白馬牽旒旒又曰庾公初上時翩翩如飛鳥庾公還揚州白馬牽旒蘇後連徵不入及薨於鎮以喪還都葬皆如謠言

穆帝升平中童兒輩忽歌於道曰阿子聞曲終輒云阿

子汝聞不無幾而帝崩太后哭之曰阿子汝聞不升  
平末俗間忽作廉歌有扈謙者聞之曰廉者臨也歌云  
白門廉宮庭廉內外悉臨國家其大諱乎少時而穆帝  
晏駕 哀帝隆和初童謠曰升平不滿斗隆和那得久  
桓公入石頭陛下徒跣走朝廷聞而惡之改年曰興寧  
人復歌曰雖復改興寧亦復無聊生哀帝尋崩升平五  
年而穆帝崩不滿斗升平不至十年也 海西公太和  
中百姓歌曰青青御路楊白馬紫遊韉汝非皇太子那  
得甘露漿識者曰白者金行馬者國族紫爲奪正之色  
明以紫間朱也海西公尋廢其三子並非海西公之子

縊一賜

以馬韉

君良反

死之明日南方獻甘露焉

太和

末童謠曰犁牛耕御路白門種小麥及海西公被廢百  
姓耕其門以種小麥遂如謠言 海西公初生皇子百  
姓歌云鳳凰生一雛天下莫不喜本言是馬駒今定成  
龍子其歌甚美其旨甚微海西公不男使左右向龍與  
內侍接生子以爲己子

桓石民爲荊州鎮上明百姓忽歌曰黃曇

音覃

子曲中

又曰黃曇英揚州大佛來上明頃之而桓石民死王

忱

氏林反

爲荊州黃曇子乃是王忱字也忱小字佛大

是大佛來上明也

孝武帝太元末京口謠曰黃雌雞莫作雄父啼一旦去  
毛衣衣被拉颯上盧合反栖尋而王恭起兵誅王國寶  
旋爲劉牢之所敗故言拉颯栖也

會稽王道子於東府造土山名曰靈秀山無幾而孫

恩作亂再踐會稽會稽道子所封靈秀恩之字也

庾楷鎮歷陽百姓歌曰重羅黎重羅黎使君南上無

還時後楷南奔殷仲堪在荊州童謠曰芒籠目繩縛

腹殷當敗桓當復未幾而仲堪敗桓元遂有荊州

王恭鎮京口舉兵誅王國寶百姓謠云昔年食白飯

今年食麥麩音孚天公誅謫汝教汝捻乃叶隴喉隴喉

喝於介反復喝京口敗復敗識者曰昔年食白飯言

得志也今年食麥麩麩麩穢其精已去明將敗也天

公將加譴謫而誅之也捻隴喉氣不通死之祥也敗

復敗丁寧之辭也恭尋死京都又大行欵疾而喉並

喝焉王恭在京口百姓間忽云黃頭小兒欲作賊

阿公在城下指縛得又云黃頭小人欲作亂賴得金

刀作蕃扞黃字上恭字頭也小人恭字下也尋如謠

言者焉

安帝隆安中百姓忽作懊懣上烏浩反之歌其曲曰草

生可攬結女兒可攬擷尋而桓元篡位義旗以三月二

日埽定京都誅之元之宮女及逆黨之家子女妓妾悉  
爲軍賞東及歐越北流淮泗皆人有所獲故言時則草  
可結事則女可擷也桓元旣篡童謠曰草生及馬腹烏  
啄丁角反桓元目及元敗走至江陵時正五月中誅如其  
期焉 安帝義熙初童謠曰官家養蘆化爲荻徒歷反蘆  
生不止自成積其時官養蘆龍寵以金紫奉以名州養  
之極也而龍不能懷我好音舉兵內伐遂成讎敵也蘆  
生不止自成積及盧龍之敗斬伐其黨猶如草木以成  
積也盧龍據廣州人爲之謠曰蘆生漫漫竟天半後擁  
上流數州之地內逼京輦應天半之言 義熙三年小

兒相逢於道輒舉其兩手曰盧健健次日鬪歎鬪歎末  
日翁年老翁年老當時莫知所謂其後盧龍內逼舟艦  
胡黠反蓋川健健之謂也旣至查浦屢尅期欲與官鬪鬪  
歎之應也

昔温嶠令郭景純卜已與庾亮吉凶景純云元吉嶠  
語亮曰景純每筮是不敢盡言吾等與國家同安危  
而曰元吉是事有成也於是協同討滅王敦翁年老  
羣公有期頤之慶知妖逆之徒自然消殄也其時復  
有謠言曰盧橙橙直耕反逐水流東風忽如起那得入  
石頭盧龍果敗不得入石頭也

苻生時長安謠曰東海大魚化爲龍男便爲王女爲公問在何所洛門東生誅其侍中太師魚遵及其子孫後苻堅殺生而代之堅封東海時爲龍驤將軍第在洛門東 苻堅初童謠曰阿堅牽連三十年後若欲敗時當在江湖邊及堅在位凡三十年敗於淝水是其應也又謠語云河水清復清苻詔死新城及堅爲姚萇所殺於新城復謠歌云魚羊田斗當滅秦識者以爲魚羊鮮也田斗卑也堅自號秦言滅之者鮮卑也其羣臣諫堅令盡誅鮮卑不從及淮南敗還初爲慕容冲所攻卒爲姚萇所殺

梁武帝天監三年六月八日武帝講於重雲殿沙門誌公忽然儻歌樂須臾悲泣因賦五言詩樂哉三十餘悲哉五十裏但看八十三子地祲災起佞臣作欺妄賊臣滅君子若不信吾語龍時候賊起且至馬中間銜悲不見喜梁自天監至於大同三十餘年江表無事至太清二年臺城陷帝享國四十八年所言五十裏也太清元年八月十三而侯景自懸瓠來降在丹陽之北子地帝惑朱异之言以納景景之作亂始自戊辰之歲至午年帝憂崩 十年四月八日誌公於大會中又作詩曰兀尾狗子始着狂欲死不死齧人傷須臾之間自滅亡患

在汝陰死三湘橫尸一旦無人藏侯景小字狗子初自  
懸瓠來降懸瓠則古之汝南也巴陵南有地名三湘卽  
景奔敗之所 天監中茅山隱士陶弘景爲五言詩曰  
夷甫任散誕平叔坐談空不意昭陽殿忽作單于宮及  
大同之季公卿唯以談元爲務夷甫平叔朝賢也侯景  
作亂遂居昭陽殿 大同中童謠曰青絲白馬壽陽來  
其後侯景破丹陽乘白馬以青絲爲羈勒 梁末童謠  
云可憐巴馬子一日行千里不見馬上郎但見黃塵起  
黃塵汗人衣阜茨相料理及僧辨滅羣臣以謠言奏聞  
曰僧辨本乘巴馬以擊侯景馬上郎王字也塵謂陳也

而不解阜茨之謂旣而陳滅於隋說者謂江東謂殺羊  
角爲阜茨隋氏姓楊楊羊也言終滅於隋云

陳初有童謠曰黃斑青驄馬發自壽陽浹來時冬氣未  
去日春風始其後陳主果爲韓擒虎所敗擒本名擒虎  
黃斑之謂也破建康之始復乘青驄馬往反時節皆相  
應 時江南盛歌王獻之桃葉之詞桃葉復桃葉度江  
不用楫但度無所苦我自迎接汝晉王伐陳之始置營  
桃葉山下及韓擒虎渡江大將任蠻奴至新林以導北  
軍之應 後主造齊雲觀國人歌之曰齊雲觀寇來無  
際畔功未畢而爲隋師所虜 禎明初後主作新歌詞

甚哀怨令後宮美人習而歌之其辭曰玉樹後庭花花  
開不復久時人以歌識此其不久兆也 後主在東宮  
時有婦人突入唱曰畢國主有鳥一足集其殿庭以嘴  
畫地成文曰獨足上高臺盛草變爲灰欲知我家處朱  
門當水開解者以爲獨足者蓋指後主獨行無衆盛草  
言荒穢隋承火運草得火而灰及至京師與家屬館於  
都水臺所謂上高臺當水也其言皆驗  
東魏孝靜武定中有童謠云百尺高竿摧折水裏燃燈  
澄滅高者齊姓也澄文襄名五年神武崩摧折之應七  
年文襄遇盜所害澄滅之徵也

北齊神武始移都於鄴時有童謠云可憐青雀子飛入  
鄴城裏作窠猶未成舉頭失鄉里寄書與婦母好看新  
婦子魏孝靜帝清河王之子也后則神武之女鄴都宮  
室未備卽逢禪代作窠未成之效也孝靜尋崩文宣以  
后爲太原長公主降於楊愔時婁后尚在故言寄書與  
婦母新婦子者斥后也 文宣天保中陸法和入國書  
其屋壁曰十年天子爲尚可百日天子急如火周年天  
子迭代坐時文宣帝享國十年而崩廢帝嗣立百餘日  
用替厥位孝昭卽位一年而崩此其效也 又童謠曰  
一束藁兩頭然河邊殺雛飛上天藁然兩頭於文爲高

河邊殺獍爲水邊洋指文宣明也 後主武平元年童  
謠曰狐截尾你欲除我我除你其年四月隴東王胡長  
仁謀遣刺客殺和士開事露反爲士開所譖死 二年  
童謠曰和士開七月三十日將你向南臺小兒唱訖一  
時拍手云殺却至七月二十五日御史中丞琅邪王儼  
執士開送於南臺而斬之是歲又有童謠曰七月刈禾  
傷早九月喫餠正好十月洗蕩飯瓮十一月出却趙老  
七月士開被誅九月琅邪王遇害十一月趙彥深出爲  
西兗州刺史 武平末童謠曰黃花勢欲落清罇但滿  
酌時穆后母子淫僻干預朝政時人患之穆后小字黃

花尋逢齊亡欲落之應也 鄴中又有童謠曰金作掃  
帚玉作杷淨掃殿屋迎西家未幾周師入鄴  
後周初有童謠曰白楊樹頭金雞鳴祇有阿舅無外甥  
靜帝隋氏之甥旣遜位而崩諸舅強盛 宣帝與宮人  
夜中連臂蹋蹠而歌曰自知身命促把燭夜行遊帝卽  
位二年而崩

隋文帝開皇十年高祖幸并州宴秦孝王及王子相帝  
爲四言詩曰紅顏詎幾玉貌須臾一朝花落白髮難除  
明年後歲誰有誰無明年而子相卒十八年而秦孝王  
薨 煬帝大業十一年帝自京師如東都至長樂宮飲

酒大醉因賦五言詩其卒章句曰徒有歸飛心無復因  
風力令美人再三吟詠帝泣下霑襟侍御者莫不欷歔  
帝因幸江都復作五言詩曰求歸不得去真成遭箇春  
鳥聲爭勸酒梅花笑殺人帝以三月被弑卽遭春之應  
也是年盜賊蜂起道路隔絕帝懼遂無還心帝復夢二  
豎子歌曰住亦死去亦死未若乘船度江水由是築宮  
丹陽將居焉功未就而帝被殺 大業中童謠曰桃李  
子鴻鵠遶陽山宛轉花林裏莫浪語誰道許其後李密  
坐楊元感之逆爲吏所拘在路逃叛潛結羣盜自陽城  
山而來襲破洛口倉後復屯兵苑內莫浪語密也宇文

化及自號許國尋亦破滅誰道許者蓋驚疑之亂也  
唐竇建德未敗時有謠曰豆入牛口勢不得久 太宗  
貞觀十四年交河道行軍大總管侯君集伐高昌先是  
其國中有童謠曰高昌兵馬如霜雪漢家兵馬如日月  
日月照霜雪回首自消滅 高宗永徽後民歌武媚娘  
曲 永徽末里歌有桑條韋也女時韋也樂 龍朔中  
時人飲酒令曰子母相去離連臺拘倒俗謂杯盤爲子  
母又名盤爲臺又里歌有突厥鹽 高宗自調露中欲  
封嵩山屬突厥叛而止後又欲封以吐蕃入寇遂停時  
童謠曰嵩山凡幾層不畏登不得但恐不得登三度徵

兵馬傍道打騰騰 調露初京城民謠有側堂堂橈堂  
堂之言太常丞李嗣真曰側者不正橈者不安自隋以  
來樂府有堂堂曲再言堂者唐再受命之象 永淳元  
年七月東都大雨人多殍殍先是童謠曰新禾不入箱  
新麥不入場迨及八九日狗吠空垣墻 永淳後民歌  
曰楊柳漫頭駝 武后垂拱後東都有契苾兒歌皆淫  
艷之詞契苾張易之小字也 如意初里歌曰黃麀黃  
麀草裏藏彎弓射爾傷其後王孝傑敗於黃麀谷 中  
宗神龍以後民謠曰山南烏鵲窠山北金駱駝鑱柯不  
鑿孔斧子不施柯山南唐也烏鵲窠者人居寡也山北

胡也金駱駝者虜獲而重載也 安樂公主於洛州造  
安樂寺童謠曰可憐安樂寺了了樹頭懸 景龍中民  
謠曰黃犢犢子挽紉斷兩足踏地鞮齠斷城南黃犢犢  
子韋又有阿緯娘歌時又謠曰可憐聖善寺身著綠毛  
衣牽來河裏飲踏殺鯉魚兒 元宗在潞州有童謠曰  
羊頭山北作朝堂 天寶中有術士李遐周於元都觀  
院廡間爲詩曰燕市人皆去函關馬不歸人逢山下鬼  
環上繫羅衣而人皆不悟近詩妖也 又祿山未反時  
童謠曰燕燕飛上天天上女兒鋪白氍氍上有千錢  
時幽州有謠曰舊來誇戴竿今日不堪看但看五月裏

清水河邊見契丹 德宗時或爲詩曰此水連涇水雙  
眸血滿川青牛逐朱虎方號太平年近詩妖也 朱泚  
未敗前兩月有童謠曰一隻筋兩頭朱五六月化爲胆  
憲宗元和初童謠曰打麥打麥三三三乃轉身曰舞  
了也 宣宗大中末京師小兒疊布漬水紐之向日謂  
之曰拔暈 懿宗咸通七年童謠曰草青青被嚴霜鵲  
始後看顛狂 十四年成都童謠曰咸通癸巳出無所  
之蛇去馬來道路稍開頭無片瓦地有殘灰是歲歲陰  
在巳明年在午巳蛇也午馬也 僖宗時童謠曰金色  
蝦蟆爭弩眼翻却曹州天下反 乾符六年童謠曰八

月無霜寒草青將軍騎馬出空城漢家天下西巡狩猶  
向江東更索兵 中和初童謠曰黃巢走秦山東死在  
翁家翁

宋仁宗皇祐中廣源蠻酋儂智高反陷邕州時謠言曰  
農家種糴家收後宣徽使狄青討平之 高宗紹興中  
鼎澧劇盜夏誠劉衡二寨據險不可破二盜有口占末  
云除是飛過洞庭湖後卒爲岳飛所破 二年李綱帥  
長沙道過建寧有僧宗本題於邑治之壁曰東燒西燒  
日月七七後數日江西盜李敦仁入竟焚其邑乃七月  
七日也 二十五年春秦熈謁告建康遊茅山題詩版

揭於華陽觀梁間是晚視之其側隱隱有白字可識末  
云榮華富貴三春夢顏色馨香一土堆是冬檜死 孝  
宗淳熙中河決入汴梁宋間爲之語曰黃河災天水來  
天水國姓也遺黎以爲恢復之兆時淮西競歌汪秀才  
曲曰騎驢渡江過江不得又爲僕舞以和之後舒城狂  
生汪格謀不軌州兵入其家縛之其子拒殺聚惡少數  
千爲亂聲言渡江事平格亦伏誅 七年正月行都餘  
杭門外墻壁有詩其言頗涉恠後廉得主名杖遣之主  
管城北廂劉君暨以失察異言坐削秩其詩不錄 十  
四年都城市井歌曰汝亦不來我家我亦不來汝家流

傳四方莫詳其指過紹熙二三年其事始應於兩宮  
淳熙末上以恢復之占訪莎衣道人何者何授以歌詞  
末云胡孫死鬧啾啾也須還我一百州後金酋葛王死  
其孫璟立不以序諸酋爭立內亂志士以撫機爲惜  
光宗紹熙三年都城市井有取程頤語錄語雜以穢褻  
盛行於市朝廷知而禁之後三年僞學之禍乃作 寧  
宗慶元四年三月甲辰有郵箒置詩謠達御前者上諭  
宰臣究其事詩亦不錄 嘉泰四年越人盛歌鐵彈子  
白塔湖曲是冬有盜金十一者號鐵彈子聚衆剽掠不  
可制賊黨稍平謬傳其鬪死白塔湖中帥臣以聞後覆

出獲之諸暨縣始就僂 開禧二年鄂州民謠塞上將軍少城南從事多宣威不可問恢復竟如何時權臣開邊鄂為宣撫使置司多辟親故幕賓聚城南為酣縱云 嘉定三年都城市井作歌詞末皆曰東君去後花無主朝廷惡而禁之未幾景獻太子薨

文獻通考卷第三百九

文獻通考卷第三百十

鄱 陽 馬 端 臨 貴 與 著

物異考十六

訛言

漢成帝建始三年十月丁未京師相驚言大水至渭水

虎上小女陳持弓年九歲 師古曰虎上地名也音斯 走入橫城門入

未央宮尚方掖門殿門門內諸衛戶者莫見至句盾禁

中而覺得 師古曰句盾少府之署 民以水相驚者陰氣

盛也小女而入宮殿中者下人將因女寵宮室之象也

名曰持弓有似周家壓弧之祥易曰弧矢之利以威天

下師古曰下是時帝母王太后弟鳳始為上將秉國政

天知其後將威天下而入宮室故象先見也其後王氏

兄弟父子五侯秉權至莽卒篡天下蓋陳氏之後云京

房易傳曰妖言動眾茲謂不信路將亡人司馬死 成

帝綏和二年八月庚申鄭通里男子王褒師古曰鄭衣

絳衣小冠帶劔之北司馬門殿東門師古曰入北司馬

也 上前殿入非常室中如淳曰殿解帷組結佩之師古

綬類所以繫帷又垂招前殿署長業等曰天帝令我居

此業等收縛拷問褒故公車大誰卒應劭曰在司馬殿

度曰衛士之師也著樊噲冠師古曰大誰者主問非常

之人云姓名是誰也而應氏乃以謹謹為義云大謹呵

不當厥理後之學者輒改此書誰字為謹違本文矣大

誰本以誰何稱因用名官有大誰長今此卒者長所領

士卒病狂易師古曰謂病狂不自知入宮狀下獄死是

時王莽為大司馬哀帝即位莽乞骸骨就第天知其必

不退故因是而見象也姓名章服甚明徑上前殿路寢

入室取組而佩之稱天帝命然時人莫察後莽就國天

下寃之哀帝徵莽還京師明年帝崩莽復大司馬因是

而篡國 哀帝建平四年正月民驚走持橐或楸一枚

如淳曰楸麻幹也師古曰橐禾稗傳相付與曰行詔籌

也音工老反楸音鄒又則久反道中相過逢多至千數或被髮徒踐師古曰徒踐或夜

折關或踰墻入或乘車騎奔馳以置驛傳行經歷郡國

二十六至京師其夏京師郡國民聚會里巷阡陌設張博具師古曰博戲之具歌舞祠西王母又傳書曰母告百姓佩

此書者不死不信我言視門樞下當有白髮師古曰樞門扇所由

開閉者也音昌于反至秋止是時帝祖母傳太后驕與政事師古曰與

讀曰豫故杜鄴對曰春秋災異以指象為言語籌所以紀

數民陰水類也水以東流為順走而西行反類逆上象

數度放溢妄以相予違忤民之心也西王母婦人之稱

博奕男子之事於街巷阡陌明離闌內師古曰闌門也音魚列反

與疆外師古曰與讀曰豫臨事盤樂亢陽之意白髮衰年之象

體尊性弱難理易亂門人之所由樞其要也居人之所

由制持其要也其明甚著今外家丁傅並侍帷幄布於

列位有罪惡者不坐辜罰亡功能者畢受官爵皇甫三

桓詩人所刺春秋所譏亡以甚此師古曰皇甫周卿士之字也周后嬖寵而

處職位詩刺之事見小雅十月之交篇指象昭昭以覺聖朝柰何不應後

哀帝崩成帝母王太后臨朝王莽為大司馬誅滅丁傅

一曰丁傅所亂者小此異乃王太后莽之應云

按訛言惟唐史志置之詩妖之後諸史皆無之惟

錯見於言不從及人痾條下今撮取其語言之妖

異類世俗所謂語讖者立訛言一門云

王莽始建國元年長安狂女子碧呼道中碧女子名也曰

高皇帝大怒趣歸我國不者九月必殺汝莽收捕殺  
之 二年十一月立國將軍建奏今月癸酉不知何  
一男子遮臣建車前自稱漢氏劉子輿成帝下妻子  
也下妻猶小妻劉氏當復趣空宮趣音促收繫男子卽常安  
姓武字仲大逆無道請論如法 天鳳元年民訛言  
黃龍墮死黃山宮中百姓奔走往觀者有萬數莽惡  
之師古曰莽自謂黃德故惡此妖捕繫問語所從起不能得  
後漢安帝永初元年十一月民訛言相驚司隸并冀州  
民人流移時鄧太后專政婦人以順爲道夫死從子今  
專主王事此不從而僭也 靈帝熹平二年六月雒陽

民訛言虎賁寺東壁中有黃人形容鬚眉良是觀者數  
萬省中悉道路斷絕到中平元年二月張角兄弟起兵  
冀州自號黃天三十六方四面出師將帥星布吏士外  
屬因其疲餒幸而勝之 光和元年五月壬午何人白  
衣欲入德陽門辭我梁伯夏教上殿爲天子中黃門桓  
賢等呼門吏僕射欲收縛須臾還走求索不得不知姓  
名蔡邕以爲類成帝時男子王褒入宮事以往况今將  
有狂狡之人欲爲王氏之謀其事不成其後張角稱黃  
天作亂竟破壞應劭曰尚書春秋左傳伯益佐禹治水  
封於梁颺叔安有裔子曰董父帝舜賜姓董氏董氏之

祖與梁同焉其後董卓自外入廢帝殺后梁本安定而卓隴西人俱涼州也袁山松曰張角一時狡亂不足致此大異斯乃曹氏滅漢之證梁卽魏地之名伯夏明於中夏非溥天之稱 後主嗣位譙周曰先主諱備其訓具也後主諱禪其訓授也若言劉已具矣當授與人甚於晉穆侯漢靈帝命子之祥也蜀果亡 魏齊王嘉平中東郡有訛言云白馬河出妖馬夜過官牧邊嗚呼衆馬皆應明日言其跡大如斛行數里還入河楚王彪本封白馬兗州刺史令狐愚與王凌謀共立之事泄俱死

晉惠帝永寧初齊王冏唱義兵誅亂逆乘輿反正忽有婦人詣大司馬門求寄產門者詰之婦曰我截臍便去耳其後冏果斬戮 永寧元年十二月甲子有白頭公入齊王冏大司馬府大呼曰有大兵起不出甲子旬冏殺之明年十二月戊辰冏敗卽甲子旬也 泰安元年四月癸酉有人自雲龍門入殿前北面再拜曰我當作中書監卽收斬之干寶以爲禁庭尊祕之處今賤人逕入而門殿不覺者宮室將虛而下人踰上之妖也是後帝北遷鄴又遷長安宮闕遂空焉 元帝永昌元年大將軍王敦下據姑孰百姓訛言蟲病食人大孔數日入

腹入腹則死療之有方當得白犬膽以爲藥自淮泗遂  
及京都數日之間百姓驚擾人人皆自云已得蟲病又  
云始在外時當燒鐵以灼之於是翕然被燒灼者十七  
八矣而白犬暴貴至相請奪其價十倍或有自云能行  
燒鐵灼者賃灼百姓日得五六萬億而後已四五日漸  
靜說曰夫裸蟲人類而人爲之主今云蟲食人言本同  
臭類而相殘賊也自下而上明其逆也必入腹者言害  
由中出不由外也犬有守衛之性白者金色而膽用武  
之主也帝王之運王霸會於戊戌主用兵金者晉行火  
燒鐵以療疾者必去其類而來火與金合德共除蟲害

也按中興之際大將軍本以腹心受伊呂之任而元帝  
末年遂攻京邑明帝諒闇又有異謀是以下逆上腹心  
內爛也及錢鳳沈充等逆兵四合而爲王師所挫踰月  
而不能濟水北中郎劉遐及淮陵內史蘇峻率淮泗之  
衆以救朝廷故其謠言首作於淮泗也朝廷卒以弱制  
強罪人授首是用白犬膽可救之效也 海西公時庾  
晞四五年中喜爲挽歌自搖大鈴爲倡使左右齊和又  
讌會輒令倡伎作新安人歌舞離別之辭其聲悲切時  
人怪之後亦果敗 孝武帝太元中小兒以兩鐵相打  
於土中名曰鬪族後王國寶王孝伯一姓之中自相攻

擊也

桓元初改年爲大亨遐邇謹音言曰二月了故義謀

以仲春發也元篡立又改年爲建始以與趙王倫同

又易永始永始復是王莽受封之年也

苻堅時有人於明光殿大呼曰甲申乙酉魚羊食人  
悲哉無復遺堅命執之俄而不見祕書監朱彤等因  
請誅鮮卑堅不從也

宋明帝時訛言東城天子出其後建安王休仁鎮東府  
帝懼殺休仁而常閉東府不居明帝又屢幸改代作伐  
以厭王氣又使子安成王代之及蒼梧王敗安成王代

立咸言爲驗術數者推齊高祖舊居武進東城村東城  
之言其在此也

齊武帝時文惠太子立樓館於鍾山下號曰東田太子  
屢游幸之東田反語爲顛童也武帝又於青溪立宮號  
曰舊宮反之窮廡也至鬱林王果以輕狡而至於窮

又武帝時小史姓皇名太子武帝曰皇太子非名之謂  
於是移點於外易名犬子處士何點曰太子者天地之  
所懸三才之所繫今化而爲犬不得立矣旣立文惠太  
子薨鬱林海陵相繼廢黜此其驗也 文惠太子與才  
人共賦七言詩句後輒云愁和帝至東昏以暴虐殞南

康王寶融卽位禪於梁以弑殞謚和帝其言乃驗焉  
梁武帝天監十三年六月都下訛言有棖棖取人肝肺  
及血以飴天狗百姓大懼二旬而止 大通五年十二  
月都下訛言天子取人肝以飴天狗大小相警日晚便  
閉門持杖數月乃止

武陵王紀僭帝位建元曰天正永豐侯蕭撫曰王不  
克矣昔桓元年號大亨有識者以爲二月了而元之  
敗實在仲春今日天正正之爲文一止其能久乎果  
一年而敗

陳後主時諸省官人多稱省主北齊末亦有此稱識者

以爲主將見省之兆未幾國亡

北齊文宣帝太子殷當冠詔令邢子才爲制字子才字  
之曰正道帝曰正一止也吾兒其替乎子才請改帝不  
許曰天也後卒爲常山王所廢殺 武成河清三年晉  
陽訛言有鬼兵百姓競擊銅鐵以捍之 後主武平七  
年爲周師所敗走至鄴自稱太上皇傳位太子恒改元  
隆化時人離合其字曰降死竟降周而死

周武帝改元爲宣政梁主蕭歸離合其字爲宇文亡日  
其年六月帝崩

隋文帝開皇初梁主蕭琮改元廣運江陵父老相謂曰

運之爲字軍走也吾君當爲軍所走乎後琮朝京師被  
拘留不反梁國遂廢 文帝名皇太子曰勇晉王曰英  
秦王曰俊蜀王曰秀開皇初有人上書言勇者一夫之  
用又千人之秀爲英萬人之秀爲俊斯乃布衣之美稱  
非帝王之嘉名也帝不省時人呼楊姓多爲羸者或言  
於上曰楊英反爲羸殃帝不懌遽改之其後勇俊秀皆  
被廢黜煬帝終失天下爲楊氏之殃 煬帝改元大業  
識者惡之曰於字離合爲大苦來也尋而天下喪亂率  
土遭荼炭之酷

唐太宗貞觀十七年七月民訛言官遣棖棖殺人以祭  
天狗云其來也身衣狗皮鐵爪每於闇中取人心肝而  
去於是更相震怖每夜驚擾皆引弓劔自防無兵器者  
剡竹爲之郊外不敢獨行太宗惡之令通夜開諸坊門  
宣旨慰諭月餘乃止 武后時民飲酒謳歌曲終而不  
盡者謂之族鹽 元宗開元二十七年十月改作東都  
明堂訛言官取小兒埋明堂下以爲厭勝村野兒童藏  
於山谷都城騷然或言兵至元宗惡之遣使慰諭久之  
乃止 天寶三載二月辛亥有星如月墜於東南墜後  
有聲京師訛言官遣棖棖捕人取肝以祭天狗人頗恐  
懼畿內尤甚遣使安諭之與貞觀十七年占同 天寶

後詩人多爲憂苦流寓之思及寄興於江湖僧寺而樂曲亦多以邊地爲名有伊州甘州涼州等至其曲遍繁聲皆謂之入破又有胡旋舞本出康居以旋轉便捷爲巧時又尚之破者蓋破碎云 德宗建中三年秋江淮訛言有毛人食其心人情大恐 朱泚旣僭號名其舊第曰潛龍宮移內府珍貨實之占者以爲易稱潛龍勿用此敗祥也 文宗太和九年京師訛言鄭注爲上合金丹生取小兒心肝密旨捕小兒無算往往陰相告曰某處失幾兒矣方士言金丹可致神仙蓋誕妄不經之語或信而服之則發熱多死如其所戒云小兒無辜者

取其心肝將有殺戮象 劉從諫未死時潞州有狂人折腰於市曰石雄七千人至矣從諫捕斬之 懿宗咸通十四年秋成都訛言有狻母鬼夜入人家民皆恐夜則聚坐或曰某家見鬼眼晃然如燈焰民益懼 黃巢未入京師時都人以黃米及黑豆屑蒸食之謂之黃賊打黑賊 僖宗時里巷鬪者激怒言任見右廂天子晉高祖天福中兩浙兒童聚戲率以趙字爲語助如言得曰趙得可曰趙可自是一國之人語言無不以趙字兼之者及晉末趙延壽貴盛浙人謂必應識後延壽爲北虜所繫而謠言益盛洎太祖受禪始悟焉 天福末

宣州太平縣掘地得石記云天子冀州人時李景據江  
表名子曰冀欲當之及太祖開統方悟冀州趙地也  
出帝開運末宋州宋城縣有異僧常挾彈持銅丸走榛  
莽中如飛指其地曰不二十年當有帝王由此建號  
後周太祖廣順初江南伏龜山圯得石函長二尺廣八  
寸中有鐵銘云維天監十四年秋八月葬寶公於銘背  
有引曰寶公嘗爲此偈大書於版白巾冪之人欲讀者  
必施數錢乃得讀訖卽冪之是時名臣陸倕王筠姚察  
而下皆莫知其旨或問之云在五百年後至卒乃鑄其  
偈同葬焉銘曰莫問江南事江南自有憑乘雞登寶位

跨犬出金陵子建司南位安仁秉夜燈東隣家道闕隨  
虎遇明興其字皆小篆體勢完具徐鉉徐鍇韓熙載皆  
不能解及煜歸朝好事者云煜以丁酉年生辛酉年襲  
位卽雞也開寶八年甲戌江南國滅是跨犬也當王師  
圍其城而曹彬營其南是子建司南位也潘美營其北  
是安仁秉夜燈也其後太平興國戊寅歲淮海王錢俶  
舉國入覲卽東隣也家道闕者意無錢也隨虎戊寅年  
也 世宗顯德六年二月癸巳有一人敝衣冠闌入中  
書升政事堂據床而坐堂吏叱之曰何人遣爾至此其  
人曰宋州官家教我來此吏具白其事於宰臣宰臣密

令遣之尋不知所適其年六月十九日世宗崩明年正月四日大宋受命

荆南高從誨鑿池於山亭下得石匣長尺餘局鏽甚固從誨神之屏左右焚香啟匣中得石有文云此去遇龍卽歇及建隆中從誨孫繼冲入朝改鎮徐州龍隆音相近

宋太祖建隆中京師士庶及樂工少年競唱歌曰五來子聲調清逸徧於里巷自建隆至開寶凡平荆湖川廣江南五國而中原混一矣時西川孟昶賦斂無度射利之家配率尤甚旣乏緡錢唯仰在質物乃競書簡扎揭

於門曰今召主收贖又每歲除日命翰林爲詞題桃符正旦置寢門左右末年學士辛寅遜撰詞昶以其非工自命筆題新年納餘慶嘉節號長春昶以其年正月十一日降王師卽命呂餘慶知成都府而長春乃太祖誕聖節名也召與趙贖與蜀同音 開寶初廣南劉鋹令民家置貯水桶號防火大桶又鋹末年童謠曰羊頭二四白天雨至後王師以辛未年二月四日擒鋹識者以爲國家以火德王房爲宋分羊未神也雨者王師如時雨之義也防與房桶與統同音 太宗太平興國中京師童兒以木雕合子中有竅藏掖下蹙之有聲號爲掖

底鬧後盧多遜有罪投荒人以為讖其在肘掖而干國  
典也 雍熙中京師人破竹為細縷以五色紙為胡蝶  
綴其杪兩兩相對手撚之遞相飛觸謂之鬪胡蝶其後  
河朔頻歲用兵 眞宗天禧二年五月西京民訛言有  
物如烏帽夜飛入人家又變為犬狼狀攫人民多恐駭  
每夕重閉深處至持兵器驅逐者六月乙巳傳及京師  
云能食人里巷聚族環坐叫噪達曙軍營中尤甚而實  
無狀意其妖人所為有詔嚴捕得數輩訊之皆非 仁  
宗皇祐五年正月戊午狄青敗儂智高於歸仁鋪初謠  
言農家種糴家收至是智高果為青所破 徽宗政和

七年詔修神保觀俗所謂二郎神者京師人素畏之自  
春及夏傾城男女負土以獻揭榜通衢云某人獻土又  
有飾形作鬼使巡門催納土者或謂蔡京曰獻土納土  
非佳語也後數日有旨禁絕 宣和六年御樓觀燈時  
開封尹設次以彈壓於西觀下上從六宮於其上以觀  
天府之斷決者簾幕深密下無由知衆中忽有人躍出  
墨色布衣若寺僧童行狀以手畫簾出指斥語執於觀  
下上怒甚令中使傳旨治之箠掠亂下又加炮烙詢其  
誰何略不一語亦無痛楚之狀又斷其足筋俄施刀鬻  
血肉狼籍上大不悅為罷一夕之權竟不得其何人付

獄盡之 七年八月有都城東門外鬻菜夫至宣德門下忽若迷罔釋荷擔向門戟手出悖詈語且曰太祖皇帝神宗皇帝使我來道尚宜速改也邏卒捕之下開封獄一夕方省則不知向之所爲者乃於獄中盡之 高宗建炎二年十一月駐蹕揚州郊祀後數日有狂人具衣冠執香爐携絳囊拜於行宮門外自言天遣我爲官家兒書於囊紙刻於右臂皆是語鞠之不得姓名上以其狂釋不問明年二月金虜犯維揚三月有明受之變紹興元年四月庚辰閬州有狂僧緣經哭於郡譙門曰今日佛下世且言且哭實隆祐太后上仙日云閬距

行都萬里逾月而遺詔至十二月越州連有火後民訛言相驚十六日當再有火樞密院以軍法禁之乃定

孝宗淳熙十四年正月紹興府有狂人突入恩平郡王第升堂踐王座曰我太上皇孫來報訃音鞠訊終不語是冬高宗晏駕明年八月王薨 光宗紹熙元年三月行都市人夜以殺相驚奔迸者久乃定與漢志永初民相驚同占 二年十二月庚寅昧爽成都府有人縗服入帳門大呼闖帥京鏗姓名後八年鏗薨相位蓋慶元六年前五日光宗晏駕後四日皇子沖温弟王薨時慈懿皇后梓宮在殯 寧宗慶元六年十月瓊州訛言妖

星流墮民舍郭七家聲如雷通守曾丰瓊山縣令移文  
往復民獠驚喧後皆坐紉 嘉泰二年六月故循王張  
俊家火後旬日市井訛言相驚有絳衣婦人爲火殃下  
墜都民皆徙避晝夜不遑寧處此訛言也禁之後亦不  
火

### 服妖

春秋左氏傳閔公二年晉獻公使太子申生出師公衣  
之偏衣謂左右異色其半象公之服佩之金玦半環曰玦以金爲之狐突歎曰  
時事之徵也衣身之章也佩衷之旗也旗表也衣所以明貴賤佩所以  
表中故敬其事則命以始賞以春夏服其身則衣之純壹其色

用其衷則佩之度

佩玉者君子之常服

今命以時卒闕其事也

卒盡

也闕閉也謂十二月盡時也

衣以龙服遠其躬也

龙雜色謂偏衣也

佩以金

胡可恃也

涼薄也龙色不能純故曰薄也冬主殺氣金行在西是謂之寒玦形半玦故曰離

梁

餘子養曰帥師者受命於廟受賑於社有常服矣

御軍常服

則韋弁

弗獲而龙命可知也死而不孝不如逃之罕夷曰

龙奇無常金玦不復君有心矣

奇奇怪非常意復反也金玦猶決去不復反意

也有心言有害太子之心也復扶目反

後四年申生以讒自殺近服妖也

鄭子臧好聚鵠冠

鵠今翠鳥

鄭文公惡之使盜殺之劉向

以爲近服妖也

漢昭帝時昌邑王賀遣中大夫之長安多治仄注冠應

日今法冠是也李奇曰一日高山冠本齊冠也謁者服

也蔡邕云高九寸鐵為卷非以賜大臣又以冠奴劉向

以為近服妖也時王賀狂悖師古曰悖惑也音布內反聞天子不豫

師古曰言有疾不悅豫也弋獵馳騁如故與騶奴宰人

游居娛戲驕慢不敬師古曰騶廐御也宰人主膳者也娛樂也戲音嬉冠者尊

服奴者賤人賀無故好作非常之冠暴尊象也以冠奴

者當自至尊墜至賤也師古曰墜隨也音直類反其後帝崩無子漢

大臣徵賀為嗣即位狂亂無道縛戮諫者夏侯勝等於

是大臣白皇太后廢賀為庶人賀為王時又見大白

狗冠方山冠而無尾鄧展曰方山冠以五采穀為之樂舞人所服此服妖亦

犬旤也賀以問郎中令龔遂遂曰此天戒言在仄者盡

冠狗也師古曰言王左右侍側之人不識禮義若狗而著冠者耳冠音工喚反其下亦同去之

則存不去則亡矣賀既廢數年宣帝封之為列侯復有

罪死不得置後又犬旤無尾之效也京房易傳曰行不

順厥咎人奴冠天下亂辟無適如淳曰辟君也適適子也師古曰辟音壁適讀

日妾子拜如淳曰無適子故也又曰君不正臣欲篡厥妖狗冠出

朝門 成帝鴻嘉永始之間好為微行出游選從期門

郎有材力者及私奴客多至十餘少五六人皆白衣袒

幘師古曰袒幘不加冠帶持弓劍或乘小車御者在茵上蘇林曰茵

車上尊也御者錯亂更在茵上坐也師古曰車或皆騎  
小故御者不得迴避而在天子茵上也茵音因  
出入市里郊壑遠至旁縣大臣車騎將軍王音及劉向  
等數以切諫谷永諫曰陛下棄萬乘之至尊樂家人之  
賤事離深宮之固挺身獨與小人晨夜相隨烏集醉飽  
吏民之家亂服共坐溷肴亡別典門戶奉宿衛之臣執  
干戈衛空宮公卿百僚不知陛下所在積數年矣  
後漢更始諸將軍過雒陽者數十輩皆幘而衣婦人衣  
繡擁髯時智者見之以爲服之不衷身之災也乃奔入  
邊郡避之是服妖也其後更始爲赤眉所殺 桓帝元  
嘉中京都婦女作愁眉啼粧墮馬髻折腰步齟齒笑所

謂愁眉者細而曲折啼粧者薄拭目下若啼處墮馬髻

者作一邊

梁冀別傳曰冀婦女又有不聊生髻

折腰步者足不在體下齟

齒笑者若齒痛樂不欣欣始自大將軍梁冀家所爲京

都翕然諸夏皆倣效此近服妖也梁冀二世上將婚媾

王室大作威福將危社稷天戒若曰兵馬將往收捕婦

女憂愁蹙眉啼泣吏卒掣頓折其腰脊令髻傾邪雖強

語笑無復氣味也到延熹二年舉宗誅夷 延熹中梁

冀誅後京都幘顏短耳長短上長下時中常侍單超左

悺徐璜具瑗唐衡在帝左右縱其姦慝海內愠曰一將

軍死五將軍出家有數侯子弟列布州郡賓客雜襲騰

翦上短下長與梁冀同占到其八年桓帝因日蝕之變乃拜故司徒韓寅為司隸校尉以次誅鉏京都正清

臣昭

按本傳寅誅左悺貶具瑗雖尅折姦首羣闖相蒙京都未為正清

延熹中京都長者

皆著木屐婦女始嫁至作漆畫五綵為系此服妖也到

九年黨事始發傳黃門北寺臨時惶惑不能信天任命

多有逃走不就考者九族拘繫及所過歷長少婦女皆

被桎梏應木屐之象也 靈帝建寧中京都長者皆以

葦方笥為粧具下士盡然時有識者竊言葦方笥郡國

讞篋也今珍用之此天下人皆當有罪讞於理官也到

光和三年癸丑赦令詔書吏民依黨禁錮者赦除之有

不見文他以類比疑者讞於是諸有黨郡皆讞廷尉人

名悉入方笥中 靈帝好胡服胡帳胡牀胡坐胡飯胡

筥篋胡笛胡舞京都貴戚皆競為之此服妖也其後董

卓多擁胡兵填塞街衢虜掠宮掖發掘園陵 靈帝於

宮中西園駕四白驢躬自操轡驅馳周旋以為大樂於

是公卿貴戚轉相放效至乘輜駟以為騎從互相侵奪

賈與馬齊案易曰時乘六龍以御天行天者莫若龍行

地者莫如馬詩曰四牡騤騤載是常服檀車煌煌四牡

彭彭夫驢乃服重致遠上下山谷野人之所用耳何有

帝王君子而驂服之乎遲鈍之畜而今貴之天意若曰

國且大亂賢愚倒植凡執政者皆如驢也其後董卓陵  
 虐王室多援邊人以克本朝胡夷異種跨蹈中國 熹  
 平中省內冠狗帶綬以為笑樂有一狗突出走入司徒  
 府門或見之者莫不驚怪 袁山松書曰光和四年又京  
 於西園弄狗以配人也 京  
 房易傳曰君不正臣欲篡厥妖狗冠出後靈帝寵用羣  
 小又於西園賣官天戒若曰在位多非其人如狗而冠  
 也 靈帝數遊戲於西園中令後宮綵女為客舍主人  
 身為商賈服行至舍綵女下酒食因共飲食以為戲樂  
 此服妖也其後天下大亂 風俗通曰時京師賓婚嘉會  
 皆作魁檉酒酣之後續以挽  
 歌魁檉喪家之樂挽歌執紼相偶和之者天戒若曰國  
 家當急殄悴諸貴樂皆死亡也自靈帝崩後京師壞滅

戶有兼屍蟲而相食 獻帝建安中男子之衣好為長  
 魁檉挽歌斯之效也 躬而下甚短女子好為長裙而上甚短時益州從事莫  
 嗣以為服妖是陽無下而陰無上也天下未欲平也後  
 還遂大亂

魏武帝以天下凶荒資財匱乏始擬古皮弁裁縑帛為  
 白帟 苦洽反 以易舊服傳元曰白乃軍容非國容也干寶  
 以為縞素凶喪之象也名之為帟毀辱之言也蓋革代  
 之後劫殺之妖也 明帝曰著繡帽披縹 軟紹反 統半袖  
 常以見直臣楊阜諫曰此禮何法服邪帝默然蓋近服  
 妖也夫縹非禮之色褻 薛音 服尚不以紅紫况接臣下乎

人主親御非法之章所謂自作孽不可禳也帝既不享  
永年身沒而祿去王室後嗣不終遂亡天下 景初元  
年發銅鑄爲巨人二號曰翁仲置之司馬門外按古長  
人見爲國亡長狄見臨洮爲秦亡之禍始皇不悟反以  
爲嘉祥銅鑄人以象之魏法亡國之器而於義竟無取  
焉蓋服妖也 尚書何晏好服婦人之服傅元曰此服  
妖也夫衣裳之制所以定上下殊內外也大雅云元衮  
赤舄鈎膺鏤錫歌其文也小雅云有嚴有翼共武之服  
詠其武也若內外不殊王制失敘服妖旣作身隨之亡  
末嬉冠男子之冠桀亡天下何晏服婦人之服亦亡其

家其咎均也

吳婦人修容者急束其髮而麤

音靡

角過於耳蓋其俗自

操束太急而廉隅失中之謂也故吳之風俗相驅以急  
言論彈射以刻薄相尙 孫休後衣服之制上長下短  
又積領五六而裳居一二千寶曰上饒奢下儉逼上有  
餘下不足之妖也至孫皓果奢暴恣情於上而百姓彫  
困於下卒以亡國

晉武帝泰始初衣服上儉下豐著衣者皆厭襖

一宵反此

君衰弱臣放縱下掩上之象也至元康末婦人出兩襜  
加乎交領之上此內出外也爲車乘者苟貴輕細又數

變易其形皆以白篋爲純蓋古喪車之遺象也夫乘者君子之器蓋君子立心無恒事不崇實也干寶以爲晉之禍徵也及惠帝踐祚權制在於寵臣下掩上之應也至永嘉末六宮才人流冗沒於戎狄內出外之應也及天下撓亂宰輔方伯多負其任又數改易不崇實之應也 泰始之後中國相尙用胡牀音陌槃及爲羌煮音陌貊炙貴人富室必畜其器吉亨嘉會皆以爲先 太康中又以氈爲紉與帕同莫格反方言帕頭燥頭也南楚江淮之間曰帕頭自關以西秦晉之郊曰絡頭字書帕頭中者也燥且消反頭及絡帶袴口百姓相戲曰中國必爲胡所破夫氈毳此芮反產於胡而天下以爲紉頭帶身袴

口胡旣三制之矣能無敗乎至元康中氏羌互反永嘉後劉石遂篡中都自後四夷迭據華土是服妖之應也 初作履者婦人頭圓男子頭方圓者順之義所以別男女也至太康初婦人履乃頭方與男無別此賈后專妬之徵也 太康中天下爲晉世寧之舞手接杯盤而反覆之歌曰晉世寧舞杯盤識者曰夫樂生人心所以觀事也今按杯盤於手上而反覆之至危之事也杯盤者酒食之器而名曰晉世寧言晉世之士苟偷於酒食之間而知不及遠晉世之寧猶杯盤之在手也 惠帝元康中婦人之飾有五兵佩又以金銀瑇瑁之屬爲斧

鈞戈戟以當笄干寶以爲男女之別國之大節故服物  
異等贄幣不同今婦人而以兵器爲飾此婦人妖之甚  
者於是遂有賈后之事終亡天下是時婦人結髮者旣  
成以繒急束其環名曰擷胡結反子紛始自中宮天下化  
之其後賈后廢害太子之應也 元康中天下始相倣  
爲烏杖以柱掖其後稍施其鐵徒猥切住則植之夫木東  
方之行金之臣也杖者扶體之器烏其頭者尤便用也  
必旁柱掖者旁救之象也施其金住則植之言因爲金  
能孤立也及懷愍之世王室多故而此中都喪敗元帝  
以藩臣樹德東方維持天下柱掖之應也至社稷無主

海內歸之遂承天命建都江外獨立之應也 元康泰

安之間江淮之域有敗屨音脚自聚於道多者至四五十

量人或散投坑谷明日視之復如故或云見狸銜聚之

干寶以爲夫屨者人之賤服處於勞辱黔庶之象也敗

者疲敝之象道者四方往來所以交通王命也今敗屨

聚於道者象黔庶罷病將相聚爲亂以絕王命也泰安

中發壬午兵百姓怨叛江夏張昌倡亂荆楚從之如流

於是革兵歲起服妖也 初魏造白帻橫縫其前以別

後名之曰顏俗傳行之至永嘉之間稍去其縫名無顏

帻而婦人束髮其緩彌甚紛之堅不能自立髮被於額

目出而已無顏者愧之言也覆額者慙之貌也其緩彌甚者言天下亡禮與義放縱情性及其終極至於大恥也永嘉之後二帝不反天下醜焉 孝懷帝永嘉中士大夫競服生箋單衣識者指之曰此則古者總衰音諸侯所以服天子也今無故服之殆有應乎其後遂有胡賊之亂帝遇害焉 元帝太興中兵士以絳囊縛紒識者曰紒者在首爲乾君道也囊者坤臣道也今以朱囊縛紒臣道上侵君之象也於是王敦陵上焉舊爲羽扇柄者刻木象其骨形列羽用十取全數也自中興初王敦南征始改爲長柄下出可捉而減其羽用八識者尤

之曰夫羽扇翼之名也創爲長柄者將執其柄以制羽翼也改十爲八者將未備奪已備也此殆敦之擅權以制朝廷之柄又將以無德之材欲竊非據也是時爲衣者又上短帶纜至於掖著帽者又以帶縛項下逼上上無地也爲袴者直幅爲口無殺下大之象尋而王敦謀逆再攻京師 海西嗣位忘設豹尾天戒若曰夫豹尾儀服之主大人所以豹變也而海西豹變之日非所宜忘而忘之非主社稷之人故忘其豹尾示不終也尋而被廢焉 孝武太元中人不復著帟七遙反頭天戒若曰頭者元首帟者助元首爲儀飾者也今忽廢之若人君

獨立無輔佐以至危亡也至安帝桓元乃篡位焉 舊  
 為履者齒皆達扶然反 上名曰露卯太元中忽不徹名  
 曰陰卯識者以為卯謀也必有陰謀之事至烈宗末驃  
 騎參軍袁悅之始攬搆內外隆安中遂謀詐相傾以致  
 大亂 太元中公主婦女必緩鬢傾髻以為盛飾用髮  
 皮義 既多不可恒戴乃先於木及籠上裝之名曰假髻  
 反 或名假頭至於貧家不能自辦自號無頭就人借頭遂  
 布天下亦服妖也無幾時孝武晏駕而天下騷動刑戮  
 無數多喪其元至於大殮力驗反 皆刻木及蠟或縛菰草  
 為頭是假頭之應云

桓元篡立殿上施絳帳鏤黃金為顏四角金龍銜五  
 色羽葆音保流蘇羣下相謂曰頗類轎音而車尋而元敗  
 此服之妖也

晉末皆冠小而衣裳博大風流相放輿臺成俗識者曰  
 上小而下大此禪代之象也尋而宋受終焉

齊武帝永明中百姓忽著破後帽始自建業流於四遠  
 貴賤翕然服之此服妖也帽自蕭湛之家其流遂遠天  
 意若曰武穆文昭皆當滅而湛亦誅死之效焉 又時  
 以燕支為朱衣朝士皆服之及明帝以宗子入篡此又  
 奪朱之效也 時又多以生紗為帽半其裘而折之號

曰倚勸先是人問語好云擾攘建武至是朝士勸進實  
爲忽遽倚勸擾攘之言驗 東昏時百姓皆著下屋白  
紗帽而反裙覆頂東昏曰裙應在下今更在上不祥命  
斷之於是百姓皆反裙向下此服妖也帽者首之所寄  
今而向下天意若曰元首方爲猥賤乎東昏又令左右  
作逐鹿帽形甚窄狹後果有逐鹿之事東昏宮裏又作  
散叛髮反髻根向後百姓爭學之及東昏狂惑天下散  
叛矣東昏又與羣小別立帽騫其口而舒兩翅名曰鳳  
度三橋裘向後總而結之名曰反縛黃麗東昏與刀敕  
之徒親自著之皆用金寶鑿以璧璫又作著調帽鏤以

金玉間以孔翠此皆天意梁武帝舊宅在三橋而鳳度  
之名鳳翔之驗也黃麗者皇離爲日而反縛之東昏戮  
死之應也調者梁武帝至都而風俗和調 先是百姓  
及朝士皆以方帛填胷名曰假兩此又服妖假非正名  
也儲兩而假之明不得真也東昏誅其子廢爲庶人假  
兩之意也

北齊婁后卧疾寢衣無故自舉俄而后崩 文宣帝末  
年衣錦綺傅粉黛數爲胡服微行市里粉黛者婦人之  
飾陽爲陰事君變爲臣之象也及帝崩太子嗣位被廢  
爲濟南王又齊氏出自陰山胡服者將反初服也錦綵

非帝王之法服微服者布衣之事齊亡之效也 後主好令宮人以白越布折額狀如髻幘又爲白蓋此二者喪禍之服也後主果爲周武帝所滅父子同時被害武平時後主於苑內作貧兒村親衣縑縷之服而行乞其間以爲笑樂多令人服烏衣以相執縛後主果爲周所敗被虜於長安而死妃后窮困至以賣燭爲業又婦人皆剪剔以著假髻而危邪之狀如飛鳥至於南面則髻心正西始自宮內爲之被於四遠天意若曰元首剪落危則當走西也又爲刀子者刃皆狹細名曰盡勢遊童戲者好以兩手持繩拂地而却上跳且喝曰高末高

末之言蓋高氏運祚之末也

後周靜帝大象元年服冕二十四旒車服旗鼓皆以二十四爲節侍衛之官服五色雜以紅紫令天下車以大木爲輪不施輻朝士不得佩綬婦人墨粧黃眉又造下帳如送終之具令五皇后各居其一實宗廟祭器於前帝親讀版而祭之又將五輅載婦人身率左右步從又倒懸雞及碎瓦於車上觀其作聲以爲笑樂皆服妖也帝尋暴崩而政由於隋周之法度皆悉改易

隋文帝開皇中房陵王勇之在東宮及宜陽公王世積家婦人所服領巾製同槩幡軍幟婦人爲陰臣象也而

服兵幟臣有兵禍之應矣勇竟廢而遇害世積坐伏誅  
唐初宮人乘馬者依周舊儀著罽羅全身障蔽永徽後  
乃用帷帽施裙及頸頗爲淺露至神龍末罽羅始絕皆  
婦人預事之象太尉長孫無忌以烏羊毛爲渾脫氍帽  
人多效之謂之趙公渾脫近服妖也 高宗嘗內宴太  
平公主紫衫玉帶皂羅折上巾具紛礪七事歌舞於帝  
前帝與武后笑曰女子不可爲武官何爲此裝束近服  
妖也 武后時嬖臣張易之爲母臧作七寶帳有魚龍  
鸞鳳之形仍爲象牀犀簾 安樂公主使尚方合百鳥  
毛織二裙正視爲一色傍視爲一色日中爲一色影中

爲一色而百鳥之狀皆見以其一獻韋后公主又以百  
獸毛爲羈面韋后則集鳥毛爲之皆具其鳥獸狀工費  
巨萬公主初出降益州獻單絲碧羅籠裙縷金爲花鳥  
細如絲髮大如黍米眼鼻觜甲皆備瞭視者方見之皆  
服妖也自作毛裙貴臣富家多效之江嶺奇禽異獸毛  
羽採之殆盡韋后妹嘗爲豹頭枕以辟邪白澤枕以辟  
魅伏熊枕以宜男亦服妖也 中宗景龍二年十一月  
郊祀韋后爲亞獻以婦人爲齋娘以祭祀之服執事近  
服妖也 中宗賜宰臣宗楚客等巾子樣其制高而踣  
卽帝在藩邸時冠也故時人號英王踣踣顛仆也 元

宗開元二十五年正月道士尹愔爲諫議大夫衣道士服視事亦服妖也 天寶初貴族及士民好爲胡服胡帽婦人則簪步搖釵衿袖窄小楊貴妃常以假鬢爲首飾而好服黃裙近服妖也時人爲之語曰義髻拋河裏黃裙逐水流 憲宗元和末婦人爲圓髻椎髻不設鬢飾不施朱粉惟以烏膏注唇狀似悲啼者圓髻者上不白樹也悲啼者憂恤象也 文宗時吳越間織高頭草履纖如綾縠前代所無履下物也織草爲之又非正服而被以文飾蓋陰邪鬪葺泰侈之象 僖宗乾符五年雒陽人爲帽皆冠軍士所冠者又內臣有刻木象頭以

裹幘頭百官效之工門如市度木斫之曰此斫尙書頭此斫將軍頭此斫軍容頭近服妖也 僖宗時內人束髮極急及在成都蜀婦人效之時謂爲囚髻唐末京都婦人梳髮以兩鬢抱面狀如椎髻時謂之拋家髻又世俗尚以琉璃爲釵釧近服妖也拋家流離皆播遷之兆云 昭宗時十六宅諸王以華侈相尙巾幘各自爲制度都人效之則曰爲我作某王頭識者以爲不祥

蜀王衍晚年俗競爲小帽僅覆其頂俛首卽墮謂之危腦帽衍以爲不祥禁之而衍好戴大帽每微服出游民間以大帽識之因令國中皆戴大帽又好裹尖

巾其狀如錐而後宮皆戴金蓮花冠衣道士服酒酣  
免冠其髻髻然更施朱粉號醉粧國人皆效之

宋太祖建隆初時當蜀孟昶末年婦女競治髮爲高髻  
號朝天髻未幾昶入朝京師 江南李煜末年有衛士  
秦友登壽昌堂榻覆其鞵而坐訊之風狂不寤識者云  
鞵友履也其李氏將覆於此地而爲秦所有乎履與李  
友與有同音趙與秦同祖 又煜宮中盛雨水染淺碧  
爲衣號天水碧未幾爲王師所克士女至京師猶有服  
者天水國姓之望也 太宗淳化三年京師里巷婦人  
競剪黑光紙團靨又裝鏤魚腮中骨號魚媚子以飾面

或曰黑水行魚水族皆陰類也面爲六陽之首陰侵於  
陽將有災明年京師秋冬積雨衢路水深數尺 真宗  
景德四年春京城小兒裂裳爲小旗繫竿首相對揮颺  
兵鬪之象也是歲宜州卒陳進爲亂出師討平之 高  
宗紹興二十一年行都豪貴競爲小青蓋飾赤油火珠  
於蓋之尊出都門外傳呼於道國朝以火德興赤火祥  
也又珠者乘輿服御飾升龍用焉臣庶以加於小蓋近  
服妖亦僭咎也 又都市爲戲加篋巾披卧辣執籐鞭  
羣吹鷓鴣笛撥葫蘆琴效胡樂胡舞長跪獻酒時狄患  
僅定上念境土未復將用夏變夷命有司禁止之與漢

靈帝時胡舞唐天寶胡服同占皆服妖也 二十三年  
 士庶家競以胎鹿皮製婦人冠山民採捕胎鹿無遺九  
庚子言者以暴殄傷仁 遂申嚴景祐捕鹿之禁 紹興初去宣和未遠婦人服  
 飾尚集翠羽為之與唐志百鳥毛織裙同占二十七年  
 交趾貢翠羽數百上命焚之通衢至是始立法亦禁之 光宗紹  
 熙元年里巷婦人初以琉璃釵為首飾唐志琉璃釵釧  
 有流離之兆亦服妖也後連年有饑流之厄

射妖

周宣王殺杜伯而無辜後三年王會諸侯田於圃日中  
 起於道左衣朱衣冠操朱弓矢射王中心折脊而崩

莊公十八年秋有蜮劉向以為蜮生南越越地多婦人

男女同川淫女為主亂氣所生故聖人名之曰蜮蜮猶

惑也在水旁能射人射人有處甚者至死以氣射人也 南方

謂之短弧即射工也亦呼水弩 近射妖死亡之象也時莊公將娶

齊之淫女故蜮生後女淫於二叔叔牙慶父 兩子見弑夫人

亦誅劉歆以為蜮盛暑所生非自越來也京房易傳曰

忠臣進善君不試試用也 厥妖國生蜮 哀公時有隼集

陳廷而死楛矢貫之楛木名堪為箭筈 石弩弩鏃也 長尺有咫陳

閔公使人問仲尼對曰隼之來也遠矣昔武王克商通

道百蠻使各以方物來貢肅慎貢楛矢肅慎東北夷 石弩長

尺有咫先王分異姓以遠方職使毋亡服服事也故分陳以肅慎矢試求之故府果得之劉向以爲隼近黑祥貪暴類也矢貫之近射妖也死於廷國亡表也象陳眊亂不服事周而行貪暴將致遠夷之禍爲所滅也其後陳卒爲楚所滅

後漢靈帝光和中雒陽男子夜龍以弓箭射北闕吏收考問辭居貧負責無所聊生因買弓箭以射近射妖也風俗通曰龍從兄陽求臘錢龍假取繁數頗厭患之陽與錢干龍意不滿欲破陽家因持弓矢射元武門東闕吏士呼問首服詔龍以重論陽不連坐其後車騎將軍何苗與兄大將軍進部兵還相猜疑對相攻擊戰於闕下苗死兵敗殺數

千人雒陽宮室內人燒盡

蜀車騎將軍鄧芝征涪陵見元猿緣山手射中之猿拔其箭卷木葉塞其瘡芝曰嘻吾違物之性其將死矣俄而卒此射妖也一日猿母抱子芝射中之子爲拔箭取木葉塞創芝歎息投弩自知當死

晉恭帝爲瑯琊王好奇戲嘗閉一馬於門內令人射之欲觀幾箭死左右有諫者曰馬國姓也今射之不祥於是乃止而馬已被十許箭矣此蓋射妖也俄而禪位云東魏孝靜武定四年後齊神武作宰親率諸軍攻西魏於玉壁其年十一月帝不豫班師將士震懼皆曰韋孝

寬以定功弩射殺丞相西魏下令國中曰勁弩一發凶  
身自殞神武聞而惡之其疾暴增近射妖也洪範五行  
傳曰射者兵戎禍亂之象氣逆天則禍亂將起神武行  
殿中將軍曹魏諫曰王以死氣逆生氣爲客不利主人  
則可帝不從頓軍五旬頻戰沮衄又聽狐虛之言於城  
北斷汾水起土山其處天險千餘尺功竟不就死者七  
萬氣逆天之咎也其年帝崩明年王思政擾河南  
北齊武平後主自并州還鄴至八公嶺夜與左右歌而  
行有一人忽發狂意後主以爲狐媚伏草中彎弓而射  
之傷數人幾中後主後主執而斬之其不自覺也狐

而能媚獸之妖妄也帝時不恤國政專與內人闍豎酣  
歌爲樂或衣縵縷衣行乞爲娛此妖妄之象人又射之  
兵戎禍亂之應也未幾而國滅

宋理宗淳熙十四年正月闍宦競以小弓矢射於殿廡  
爲戲弓長尺餘箭纜數寸近射妖也 寧宗慶元五年  
諸軍器械所造筒子弩柳木牌以爲戲木弩加以竹筩  
蔽以方布剔以角篔時朝廷遣使閱習器械射妖之戒  
若曰除戎器皆兒戲也後開禧卒有兵弗戢之禍

文獻通考卷三百十

文獻通考卷第三百十



